

龍洲先生集一卷附錄  
一卷

宋劉過撰

清抄本〔清翁同書跋〕

一冊


本部书开始

书 号 6156

本片卷含

龍洲集

宋劉過  
石研齋  
心氏藏本



龍洲先生集序



古今以詩名家者衆矣余兄改之晚出每有作輒伸尺紙以為稿筆法適縱隨為好事者所拾故無抄集詩章散漫人間幸從會粹解嘗遊江浙涉淮甸得詩詞表啓賦序於所處遊中終成帙多為朋儕取去歲月久矣應酬几不能給或以是而獲謗吁上而李杜韓柳近而歐蘇陳黃大篇巨帙爛如日星絢如綺組膏澤流於無窮於此何足秘哉用是鋟木以廣其傳每得名賢序跋詩文亦多當陸續以刻少有舛闕不敢輕意竄易或收善本能一賜參對至願時端平紀

元六月望日劉澥謹題

龍洲先生集

廬陵劉過改之著



西蜀王朝用汝行校

襄陽歌

十年著脚走四方胡不歸來兮襄陽襄陽真是用武國  
上下吳國天中央銅鞮坊裏弓作市八邑田熟麥當糧  
一條路入秦隴去落日彷彿見太行土風沉渾士奇傑  
烏烏酒後歌聲發歌曰人定兮勝天半壁久無胡日月  
買劍傾家貲市馬托生死科舉非不好行都兮萬里人  
言邊人盡麓材卧龍高卧不肯來杜甫詩成米芾寫二  
三子亦英雄哉

多景樓醉歌

君不見七十二子從夫子儒雅強半魯國士二十八將  
佐中興英雄多是楚陽人丈夫生有四方志東欲入海  
西入秦安能齷齪守一隅白頭章句浙與閩醉游太白  
呼峨岷竒材劍客結楚荆不隨舉子紙上學六韜不學  
腐儒穿鑿註五經天長路遠何時到側身望兮涕沾巾

紅酒歌呈京西漕劉郎中立義

桃花爲麪杏爲藥酒醞仙方得新法大槽迸裂猩血流  
小槽夜雨真珠滴岷山之北古襄陽春風爛熳花草香  
乘輅誰爲部使者金閨通籍尚書郎見樣愛民真父母  
十萬人家感恩厚鵝兒不酌宜城黃流霞造此江南酒

輪蹄日日行樂同琥珀漱灑琉璃鐘珊瑚枝下貴公子  
人面日色相爭紅欄干十二開簾幔腰鼓轟雷奏仙樂  
翠翹金鳳大堤倡玉纖捧勸羅衣薄人生百歲能幾何  
海棠花開春較多有貂可解換一斗醉到天曉待作麼

瓜洲歌

今年城保寨明年城瓜洲寇來不能禦賊去欲自囚偉  
哉淮南鎮禹貢之揚州念昔叢爾虜馬箠輕江流翠華  
離金陵人有李郭不幸被帳下兇一箭斃其首帝已有  
遺臭鮮血粘髑髏敗軍慘無主蛇豕散莫收勢當截歸  
路盡與俘馘休甲兵洗黃河境土盡白溝天子棄不取  
區區乃人謀金帛輸東南禮事昆夷優參差女牆月深

夜照敵樓泊船運河口頗為執事羞

盱眙行

車徐行馬後馳天寒遊子來盱眙功名邂逅未可知生  
身畢竟要何為既不起草黃金閨又不待宴白玉墀何  
不夜投將軍飛勸上征伐鞭四夷滄海可填山可移男  
兒志氣當如斯安能生死因毛錐八韻作賦五字詩金  
牌郎君黃頭兒有眼不忍重見之志大材踈浩無期逢  
人舉似人笑嬉謂為癡人未必癡喚作奇士何能奇

從軍樂

蛟龍寶劍鸞鶴刀黃金絡馬花盤袍臂弓腰大出門去  
百戰未怕臯蘭麝酒酣縱獵自足快詩成橫槊人稱豪

但期處死得其所一死政自輕鴻毛將軍三箭定天山  
丞相五月入不毛生前封侯死廟食雲臺突兀秋山高  
書生如魚蠹書冊辛苦雕琢真徒勞兒時鼓篋走京國  
漸老一第猶未叨自嗟賦命如紙薄始信從軍古云樂

登昇元閣故基

脚力倦矣盍少休侵晨更作昇元遊眼中已不見二百  
四十尺突兀之高樓但見炊烟萬竈宿貔貅上有啼鴉  
噪鵲如泣訴下有藤蔓老樹根據枝相蚪想其結締初  
匠石巧與造物侔楠椳斡拱不知幾大木一木牽挽回  
萬牛山川退聽左右受約束日月烏兔早暮東西流阿  
房之旗矗立矮如戟臨春結綺望仙三閣俱下頭孟垓

塊潛培塿而已矣蹄涔洞庭芥為舟拄撐霄漢彈壓地  
千界下歷梁唐秦隋晉漢周一朝世故有翻覆禍結祝  
融回祿與鬱攸灰飛障天烟焰熾一火三月爛不收遂  
使觚稜化草莽丹艘成墟丘吾聞至人侈儉初何心有  
第一把蓋頭便可留何必窮極土木事妖怪駘削赤子  
膏血斂以哀是故子劉子不仙不佛亦不侯視鸞臺鳳  
閣為蘧廬百萬買宅亦夢幻泡影漚江西豈無家白沙  
翠竹泉石幽茅簷曝日搔背癢籬缺墻破手葺修爭如  
以天地為室廬日月行住坐卧得自由不為朱門是不  
作白屋羞有時騎鯨千里遊汗漫有時蛤蜊遽食龜殼  
秋彼昇元閣者亟成而復壞腸亦不能為之斷心亦不

能為之憂造物何足云此身自贅疣譽堯毀桀未必公  
是非丘跖兩窖蟻與螻日斜諸公急下山我有斗酒歸  
去來兮相與勸酬

### 大雪登越州城樓

北風吹雪天盡頭蘇州未了來越州越人夜乘剡溪舟  
烏喙還念棲山不吳人載酒登虎丘窈窕萬舞雜清謳  
迤邐茂苑來長洲不顧麋鹿蘇臺遊我獨忍凍城上樓  
欲擒元濟入蔡州鐵騎突出風颼颼越人驚倒吳人愁

### 望幸金陵

建鄴水大勝武昌魚有味江東雲不比渭北春天樹春  
天門岸岸兩岸石壁立石頭鍾阜龍虎東西分推牛醜

酒家家準擬犒六軍翠華不來冷落行宮門泰華不易  
得天下關中為本根懷哉金陵古帝藩干船泊兮萬馬  
屯西湖真水真山好吾君亦豈忘中原

艤舟采石

我昔南遊武昌夏口之山川赤壁弔古齊安遠又嘗北  
抵鶴唳風聲地八公山前望淝水誰令艤舟牛渚磯樓  
船蔽江憶當時周郎未戰曹瞞走謝安一笑符堅危黃  
雲如屯夜月白箭痕刀痕滿枯骨健兒飯飽飲馬來意  
氣猶雄歌尚烈只今采石還戍兵諸將奄奄泉下人飯  
囊盛飯酒甕酒去位三衙稱好手

題潤州多景樓

金山焦山相對起挹盡東流大江水一樓坐斷水中央  
收拾淮南數千里西風把酒閑來遊木葉漸脫人間秋  
煙塵茫茫路渺渺神京不見雙淚流君不見王勃才名  
今蓋世當時未遇庸人爾琴書落魄豫章城滕王閣中  
悲帝子又不見李白才思真天然時人未省為謫仙一  
朝放浪金陵去鳳凰臺上望長安我今四海行將遍東  
歷蘇杭西漢沔第一江山最上頭天下無人獨登覽樓  
高思遠愁緒多樓乎樓乎柰汝何安得李白與此樓長  
突兀

清溪閣次胡仲方韻

瓊樹枝新梅蘂迸與君携手清溪問舊時狎客歌舞場



何似詩人風雪逕溪邊傑閣高峻層左右華屋連飛甍  
依稀王謝鳴珂里髣髴簪笏雲母屏古來繁華各衰歇  
只有不磨惟壁月小船何處載愁來哀怨一聲吹笛裂

呈陳總領五首

旄頭撓槍銳衝擊殺氣隆隆半天黑千家悲哀萬家哭  
唐鄧征虜招不得北斗移杓向西指八月風高塞塵起  
大軍忠義赴襄陽飛鳥潛魚未知死黎黔殷憂痛無策  
願得空中降韓白嗚呼何代無奇才世間未有黃金臺

其二

太宗造唐剽隋亂仁義結民過炎漢胡雛負恩逆天紀  
忠義回天四方起嗟哉主將失紀律百萬秦人半為鬼

浮雲改變異今古不謂前車眼中睹當時潼關說哥舒  
今日襄陽說皇甫

其三

先生文章擅經緯戰法淵源如孔子當時蠻獠沸溪洞  
一掃蠻風淨如水曾中氣壓萬人將億萬貔貅資餽餉  
漢家火德接天統秘計奇謀堪任相願公飛章告天子  
胡疾如風走如鬼

其四

商渠馳河河可憑精衛填海海可平物情大忌不量力  
立志亦復嘉專精億昨痛哭麗正門白袍黑帽如遊魂  
中書堂留草茅疏不賜誅戮光宗思暮年志氣耻凋喪

廣長陽中弔名將願持上方三寸鐵細剖赤心告今上

其五

今上聰明過堯湯師王忠純如魏王君玉戮力殄仇虜  
六月戈甲飛冰霜泗州已復漢正朔議飾寢廟修洛陽  
草茅螻蟻百無用山林豈復中原夢敬湏洗眼俟河清  
讀公浯水中興頌

憶鄂渚

我離鄂渚已十年吳兒越女空華鮮不如上游古形勢  
四十餘萬兵籌邊中原地與荆襄近烈士烈兮猛士猛  
澤連雲夢寒打圍城接武昌曉排陣書生豈無一策奇  
叩閣擊鼓天不知却思仙人白玉笛胡床醉倚南樓吹

貂蟬兜鍪兩岑寂若耶溪傍還作客容餘黃鶴舊題詩  
醉筆顛狂驚李白

寄竹隱先生孫應時

蘇州酒滴如珍珠公能醉之酒百壺得閑政恐不來耳  
來則倒屣相與俱江山繞樓詩句好奔走萬變同馳驅  
大書小草各有能雷電震耀鶯花姝當其半醉尚醒在  
宛若處女未嫁夫孟行到手湖海竭翻覆雲雨來湏臾  
羲之屈使坐北面命騷如役僕與奴角巾斜飄鬢毛出  
筆墨顛倒衫袖烏回旋左右如有礙歸路不記長鬚扶  
賓儕指摘士竊笑亦有好事描為圖或云先生鬱於用  
浮沉欲以酒自娛實非能飲姑好客不時斗酒由人湏

若余乃是真飲者糟丘日日鄉何無雖然人亦難意料  
未可目以為酒徒相逢擺略邊幅盡曾次開豁無城郭  
飲藏窮達付之酒不以禮法自束拘情歸一真舉無偽  
滑稽玩世為通儒飲之不飲無不可醉醒醒醉同一區  
癡人之前莫說夢夢中說夢愈濶迂客來輒飲飲輒醉  
此其所以為竹湖不然他人豈無酒欲去此脚自懶趨  
計公之客日百數結束冠帶紛坐隅欲言喉牙物如梗  
中懷腹非外示愚不如鄙性好誠實退無所議進不諛  
歐公自愛曼卿放昌黎亦喜劉義麓蒲城風雨重陽近  
黃花籬落金英敷山高凜風吹客倒公樓雖小主者殊  
狂當相就取一醉有酒飲我無酒酌此即雖狂亦可喜

我去俗子疇當呼世無人兮亦已久公不容我誰容乎

### 明州觀大閱

書生燈牕因毛錐說着刀劍何時持忽聞殷殷金鼓震  
驚起塊坐筋骸衰國朝右武重扶獮列郡敢不張其威  
萬家駢首遮道看我亦後逐人後隨武夫橐鞬陳整整  
虎豹挈攬旌旗麾人言吳兒盡脆弱身髮文斷勇未知  
不見拔山昔項羽何必燕趙士始竒軍容粲粲生光輝  
悲風慘淡殺氣怒對此忽作邊頭思熊羆不譁曉爭出  
萬騎馳突寒打圍紛紛毛血腥原野箭竹正墮驚鴻飛  
將軍仰笑兵軍賀金帛填委深溝池十年文窮坐百拙  
感慨一賦從軍詩

嘉泰開樂日殿巖涇原郭季端邀遊鳳山自來美  
堂而上湖亭海觀梅坡石林無不歷覽最後登冲  
天樓下介亭觀騎射胡舞賦詩而歸

結束戰袍騎戰馬冠軍將軍宛如畫前呵小駐來美堂  
箭去弓鳴飛鳥下青林路轉八岿崑湖亭海觀爭為高  
誰知鳳舞龍飛外別有樓閣橫雲霄回旋左右皆遊歷  
人物江山兩英特風流標致梅嶺梅磊落青襟石林石  
側身更上天上行好風吹下笑談聲山神川后領要束  
遁走虎豹藏蛟鯨摩挲苔蘚題詩去萬鼓叢中雜胡舞  
衆賓捧酒壽主人將軍自是擎天柱看山看水時一來  
錢塘吳越何小哉指點中原百城在功名逼人有機會

### 古詩

涼生几硯牕未糊秋風射入如相呼牀頭吳鉤作龍吼  
便欲乘此擣穿廬丈夫詩膽如斗大摩娑笑與歌楚些  
生平柔腸作鐵堅挑盡寒燈擁襟坐撞鐘打鼓天欲明  
鴉未知曉鷄先驚夜來有雨不須問聽取牕前蕉葉聲  
老僧慣閑定較可山色朦朧半煙鎖玉簪委地怕禁持  
消息雨中彈指過前回十日得一晴遠山松檜如潑青  
癡雲冉冉自辟易半江滾滾金龍生桂花畢竟終蹠薄  
強出嬋娟懶梳掠正緣久不見雲生事半功倍掃蕭索  
人言快意難得時世間樂事須生悲轉頭潑墨天地黑  
依然雨脚如絲垂山翁豈識神龍志特地霖霖阻遊意

不知金鴨香篆長擁鼻猶可看文戲重重疊疊添青蒼  
誰謂濃翠逸叢篁草木過濕有香意衣籠篤褥篝籠湯  
峭巖萬丈苔斑駁日固甚佳雨不惡晴明晦冥俱可觀  
芻豢有時薦藜藿愛山之癡如愛詩或日或雨皆足奇  
君不見若把西湖比西子淡粧濃抹總相宜

上譙江州

丘公鎮金陵辛老治京口君王神武欲籌邊九江更使  
何人守九江太守今譙侯德量容九州詩書禮樂晉元  
師意度閑遠和而謀清尊對客温如玉同上庾樓望西  
北胡塵萬里氣壓之客有白頭何碌碌出門烟水空茫  
茫西為漢沔南衡湘指點武昌在何許買船又謁吳侯

去

觀三疊泉

五老峯<sup>北</sup>峩巖巔龍泉三疊來自天只應開闢便有此山  
雲蔽護經歲年一朝何事失扁鐻樵者得之人共傳欲  
往從之人憚遠嶮溪絕壑窮攀緣初疑霜崩湧天谷翻  
若雲奔下岩宿散為飛風颺輕烟垂似銀絲貫珠玉隨  
風變態難盡名觀者洞駭心與目清寒侵袂心益爽清  
甘熨齒手屢掬我欲攬之作玉虹似開九丈錦屏風有  
若挿碧金芙蓉笑騎揮斥凌太空窮源直到天河東

贈許從道之子祖孫

祖孫今年幾年齒兩髻耽垂到耳讀書要以六經先次

第漢唐十七史老夫之見竊不然別有一說為舉似方  
今孽胡日衰甚河朔早暮風塵起腐儒酸寒作何用國  
冢所欠竒偉士丈夫立身兩字盡臣子忠孝而已矣吾  
觀汝相頭面濶顏色麓厚黑而紫汝翁七十鬢髮轉汝  
父科第遲如此與生生死蠹文字土田官人村夫子不  
如左彎右挾弓肉食封侯差快耳

郭帥遺蘇羹

書生窮無食肉相若不能官猶崛強一杯紫巖江西羹  
萬戶封侯猶未當主人幕下三千士談王說伯如蠶起  
日日推鮮與擊肥饜飫腥羶飽而已此生只願喫此羹  
坐看將軍勲業成金山乞取一片山要看澌澌兒拳短

窮人便是知田漢

舟中

扁舟去門風怒惡舟入深溪雪花落我行無事有底忙  
且向荻花深處着隣船乞火炮蛤蜊尊中濁醪把一卮  
陶陶萬事不復理凍口且吐寒酸詩

村墅

俗子有錢村亦樂秋田米熟歌牛角三家村墅無官方  
夜半呼盧笑聲譁尋思我輩不如君平生讀書徒苦辛  
遭時喪亂未得志長策短藁無由伸不知賣劍買牛去  
也學此翁村裡住只愁夜半月明時得意無人知詩句

題一犁春雨圖後

阿耘無田食破硯奉親日糴供朝飯有田正恐拙把犁  
何得更為盡圖看汝父名汝汝當知有田無田未可期  
有田不耕汝懶病無田盡田真盡餅盡田之外乃盡牛  
捕捉風影何時休頭上安頭入詩軸全家不應猶食粥

寄竹隱先生孫應時

竹湖人之英劇縣勇自試三年種桃李遺愛及童稚咸  
欲父母之謂吾公之子獨有督郵嫌見謂不了事瑕疵  
催科細欲以三尺治八月羈僦樓半年縻隱市小窓天  
日晴灑落自宵次抖擻舊塵埃楮札左右置寄傲點畫  
間揮染當遊戲人賢世所希嗜好人共貴車馬鬧填門  
載酒日紛至大業極豪放小草亦姿媚斂藏經綸業進

此第一義玉版抄歌詩石碑刻圖記人家錦為軸高壁  
垂至地襲藏較工拙臨寫費同異爭如老劉子落魄一  
狂士半生不識書顏能會其意寒泉驥馬飲平陵蛟龍  
起得非久幽憤予以發奇氣政使鍾鼎跡自足名一世  
毛錐久見絕一見尚能喜酒邊袖予詩不譽亦不忌有  
時奪之去箱篋餘故紙如持將軍誥屢博姑蘇醉

同許從道遊涵碧

犯暑日午來坐到日落歸松桂叢團團竹光淨輝輝乳  
竇成濯纓綠染身上衣却傾所携酒對酌老石磯幽鳥  
當歌者薦以首山薇斂藏大千界游戲塵尾揮寺門長  
安道結束馱馬肥醉鄉訪羶葦屏風內紅圍我亭不闌

鑠何人歎柴扉掉臂樵擔行藤蘿自烟霏古所謂迂濶  
若此二子拂旣非携娉婷又乏玉鞍飛不知有何好林  
泉少焉依境勝更着語鬼神暗呵譏但知笑他人不覺  
自己非

湖學別蘇召叟

失學老無成寧不心自慊子卿生吾後逸俊眼未見委  
身入鑪錘顧此金百鍊有如頑鈍質豈可便磨剗看君  
說經旨不異甌水達小詩雖有技風味亦不淺我途未  
易窮本自安眠飯俯仰道德光耳目自濡染涼風忽秋  
思一夜牕紙颭平生湖海夢高興動淮沔追思狂蹤跡  
失處不可掩醉提黃鶴樓一擲賭百萬只今覺衰甚四

海游已倦所餘習氣在未了一第欠師友貴隆親古學  
當自反小夫事機械心甚山川險半生客吳粵生死交  
情見誰知塵土中得君初識面何時束裝來草草衾裘  
辦密邇戀軒誠功名期歲晚

答曹元章

曹元章以謹畏喜義雅為鄉里所重縣官自令佐以  
來皆敬之疑若取友必慤蒞之士乃如某者實自放  
於禮法之外元章旣不以狂弃之方且粉飾語言以  
媚夫非議我者惜乎相知而未深也唐賀知章遂知  
開元末年之變託意鑑湖一曲以歸落魄四明自號  
狂客至相率李白劇談痛飲呼為謫仙由今觀之豈不



甚恠然黃冠錦袍屣弃爵祿與夫炙手權門推而不  
去者其人品孰為賢否孔光張禹皆大儒平日託經  
自文當王氏墓木未拱之秋相與唯阿無骨鯁臣子  
氣自劉更生生死天下公論之口皆箱而不敢肆鼎祚  
陸沉繫誰之罪吾觀天下齷齪之士滔滔皆是後世  
必有好予之狂者則又系之以詩其詞曰

先生修廉隅日日自警畏老夫寄杯酒狂亦非所諱酸  
醜雖不同各自有正味切莫對癡人說憂其詞費

古意席上為徐子宜侍郎賦

桃李多芳妍開落如春風託身終身天花不百日紅殘  
月望朝日各自相西東為君整儀容照水不照鏡為君

進甘旨君視內有董悲歌欲感君聲若君不聞金玉徒  
結君君看若浮雲父母長嘆息謂兒好容德脂澤固不  
妍珠翠亦無色娉婷艷陽春自醜不自惜君心河漢流  
為雨不復收妾心東流水赴海終不止

懷古四首為知己魏倅元長賦兼呈王永叔宗丞

戴少望

言理不可求吾將訊蒼蒼草木被春華

才

高未為福名大或不祥煌煌太史公逸氣橫八方瑞麟  
出非時巷伯終見戕晏嬰不可作鮑叔遙相望發憤著  
春秋掩奪日月光文章誠可傳毀辱庸何傷

其二

高高黃金臺燕趙爭趨風後來得荆卿恩禮盡鞠躬丈  
夫易感激况在窮厄中縞衣登素車函谷照已空吕政  
當野死燕丹無奇功俠骨化為鐵血變海水紅英憤氣  
不磨今為亘天虹

其三

天地有大經聖賢實先覺一身萬世則激厲為忠撲周  
勃真少文汲黯信無學巋然社稷臣漢脉終有托微臣  
有揚雄百拜羨新作男兒無英標焉用讀書博

其四

嗣宗黨司馬徒爾舖其糟叔夜屹玉山落落崑崙高神  
仙之可求 湯或非聖人况識卿與昭一死

繼結纓孤竹爭清標蕩陰一杯血綵鳳無凡毛鴟鵂嗜  
腐鼠竟絕終身交

雨寒寄姜堯章

一冬無此寒十日不得出閉門坐如鉤老去萬感八  
治遊亦餘事况乃燈火畢獨怜鏡湖春一一各秀發  
枝條綴芳蕤恹悴變倉卒凡草何足云誰弔梅柳屈東  
城有佳士詞筆最華逸持此徃問之雨濺袍袴濕蠻牋  
定送似來時詩思溢醉字作蛇鴉行草倩蘇十

海棠得無字

步障蜀州錦重重碧羅襦嬌多不勝春十五未嬪夫我  
欲金屋之貯以貢上都窈窕飛世間穠李侍綠珠冶容

致人疑詎知非妖狐雉扇開綠綺君王麗華俱後庭非  
無花有寵爭得無八姨淡手抹試粧不施朱不如玉環  
翠睡起恣態殊人言花傾國况乃下蔡乎

謁郭馬帥

千金買駿馬百城市蛾眉長安酒家樓揮酒驚人詩天  
子不得臣公卿氣吞之俯視兒女輩自詭男子奇誰知  
金陵都五年重来茲黑貂日以弊塵埃鬢成絲故人風  
雨散知己今為誰郭侯山西英而有熊豹姿魏哉西忠  
廟喬木人所思垂芳到雲仍大將奕世為兄弟各三衛  
父子步武隨萬戶侯冠軍金印何纍纍雖然平戎策終  
鬱未得施方今群胡擾似覺虜運衰達鞞軍其西會以

蒙國斯蛇豕互吞噬干戈極猖披盜賊毛蝟起斂民及  
刀錐父老思漢官壺漿後王師吾君自神武妙笑出籌  
帷收攬天下才尺寸不可遺機會一日來恢復此其時  
况如郭侯者禮賢正謙卑使之會雲龍列城歸指麾安  
知古中原不使同驅馳迺也久淪落狂名諸公知然亦  
壯心膽志慕鞭四夷脫靴奴將軍舉扇障元規有晉世  
不賞詩酒聊自嬉霜風忽無情一夜吟徹肌高卧百尺  
樓閉門無晨炊起視匣中劍依舊光陸離有思或可報  
一死所不辭

悲淮南

淮民窮到骨忍復推其肌不知鐵錢禁作俑者為誰行

商斷來路青野多流離主人日邊來四牡驅以馳或云  
易之是或云收之宜幾人困往返逐逐文書移救焚卒  
無策燎火久益滋緬懷征權初山海煮摘時雖云便公  
家亦復撓其私今者縱虎狼而使渴與飢蕭蕭蘆葦林  
日夜邊風吹悲哉淮南民持此將安之

俞太古嘗扣閣上書有名天下予甚敬之相會於

姑蘇將歸洞庭讀舊書以壯其行

人樹俱不堪歲月駒隙過老懷泪如洗欲唱誰當和洛  
陽今少年弊事勞力破精神經百鍊鋒銳堅不挫陶名  
滋惟舊歌席快一坐氣燄九霄虹磊落萬玉貨平生牀  
上下樓輒讓子卧諸公吮疽耳不去良可唾洞庭清風

熟肄業情勿惰有詩寄來看工拙吾能課

九日鄂渚登高楚觀分韻得能字

一山如龍來起伏力不勝老夫跨其脊半空欲飛騰尚  
念同遊人一二東南朋稅駕為小留木末朱欄凭遠水  
天共濶秋風響飢鷹城郭千萬家營壘相依憑年年重  
陽節高處盡可登南樓與北榭遊覽昔所曾插花楚觀  
上醉舞僅所能驚倒地上人白日看上昇

讀書

重尋讀書盟筆硯已荆棘只堪把鉏在趣此尚有力世  
途風波惡躬履見險側敢云賣文活一錢知不直

思故人

朋從紛如雲益覺索居甚肺腸百憂集午夜不安寢長  
恐木石心化作萋兮錦日暮懷佳人霜風悄寒凜

歸耕

途窮百無成或許營菟裘依然大槐宮蟻穴夢封侯人  
生眠飯耳物外亦贅疣科名付諸公老矣吾歸休

自歎

群公列屋居官貴輒鼎台艷粧照珠翠寒谷噓春回書  
生窮蹇甚一笑百禍胎何時業債盡面目還本來

贈鄉人周從龍談命

廬陵儒萬人頗亦出青紫老子三不歸未省鄉里士暮  
年罕交遊僅識子周子風流屬當行豈止談天耳夜從

青樓飲一醉幾欲死

送程伯俞赴海陵蘇使君之招

紅裙簇雕筵一醉當鯨吸使君若問余為道貧徹骨

代壽韓平原

衣鉢登庸復舊氈文王尚父趙平原自從慶曆到今日  
只說開禧初改元朝闢東齋廣東閣夜看南極照南園  
九霞觴舉先旬浹却領千官壽帝垣

其二

際會風雲振古難十年袖手且旁觀要令隣敵尊裴度  
必向東山起謝安一品千齡靈壽杖五公四世進賢冠  
功成裂地封留了却赴赤松盟未寒

其三

疇昔張旃過相時相人爭覩漢官儀未能鏡刻燕然石  
不忍摩娑畫錦碑慷慨欲平千載恨經營已數十年遲  
要令閱古詩篇偉好讀車攻復古詩

其四

國付平章衆正開凌烟錄盡到雲臺鴛鴻充序皆桃李  
羔鴈成群及草萊強國斷無逾此策隨車未必盡真材  
更須奴幹垂綸手看取靈螯上手來

其五

宇宙之間物物春戚疎曾不問陶鈞裔分裴皞東西眷  
詛篤嗣宗南北隣中令諸孫難偏識栖筠族子老堪親

試指內舉拘挛迹無異平原十九人

壽建康 太尉

萬里寒風一布袍特將詩句謁英豪正當武曲臨凡世  
恰值驪龍出海濤五馬盡投千歲鶴六軍爭獻萬年桃  
不因此日滄溟近一釣那能得巨螯

慶周益公新府

潭々新府列名卿玉帶金魚喜氣橫能廣萬間庇寒士  
定容駟馬向高閣午橋莊上江山秀獨樂園中花草榮  
終作羨哉輪奐頌清臺又奏相星明

辭周益公

一曲歸歎浩々歌世間無地不風波人從貧賤識者少

事向艱難省處多紫塞將軍執佩印玉堂學士夜鳴珂  
太平宰相不收拾老死山林無柰何

代上譙太尉

丁寧天語聽傳呼叱咤雷霆壓萬夫澤國使臨殊玉節  
彤墀香近惹金爐慶逢龍躍風雲潤職有蟬聯父子俱  
援手墜淵餘事爾故人有子在泥塗

謁易司諫

已死姦諛老舐牛非才詎可鎮西州豺狼逐去群狐惧  
鷲鳥雖多一鷲秋天下孤寒有生意諸蕃元帥為清修太  
平更有當年事未可庶纖只麼休

其二

十載長安五往來立談無語口慵開懶看齷齪隨時士  
誰是艱難濟世才韋布豈無堪將相廟堂未易賤蒿萊  
上書欲謁平章去光範門前肯自媒

上金陵章侍郎

龍虎東西兩踞盤帝教殫壓此山川風行魏蜀三分國  
浪靜江淮萬里天半面旌旗佳麗地十州鼓角鬱蔥邊  
便當擊楫中流誓莫使鞭為祖逖先

其二

欲上雲霄虎豹關失身一落市城間經過魯肅指時康  
想像謝安遊處山去國夢竟愁切：感時淚滴血斑：  
少陵却欲依嚴武妻嫂輕人未敢還

上袁文昌說友知平江

秀骨如仙孕武夷故教手筆世宗師隸分唐漢諸家字  
句厭陳黃二子詩茂苑雨晴花發處洞庭霜重橘黃時  
塵埃俗吏那能此一段奇功自可知

其二

車馬城中早上忙子城內裡看星郎十州已茂園扉草  
一炷初凝畫戟香銅剖虎符新雨露玉持使節舊風霜  
明年櫻筍成時候不在烏臺即玉堂

其三

欲上姑蘇望虎丘小邦寧有此風流山川形勢今三輔  
人物英雄古列侯華屋鱗鱗冠蓋里畫橋曲曲管絃樓

金陵蜀郡俱踈遠除却皇都第一州

其四

行盡淮南日日東自携隻影入吳松人生五馬方知貴  
客老諸侯嘆未逢適意秋風寧為鱠驚心半夜忽聞鐘  
十年無計離場屋說着功名氣拂霄

其五

已辦行都欲去船箇中因得少留連長安在望空悲日  
刺史誰知別有天鼓吹後車喧水際旌旗前騎簇花邊  
書生不願懸金印只覓揚州騎鶴錢

寄李侍郎

未照玉堂金炬蓮地官董正職尤專常經要足邦中賦



勝筭猶煩馬上鞭黃閣少須持紫橐黑頭早已繼青氈  
方今講論肥民策不數橫流地上錢

寄湖州趙侍郎

桑柘村：煙樹濃新秧刺水麥梳風舟行莒雪雙溪上  
人在蘓杭兩郡中鼓角麗聲相且莫旌旗小隊問青紅  
主人夙有神仙骨合住水晶天上宮

謁淮西師

家住徐州未卜還歸心正在杳冥間東遊吳會三千里  
西入成都一萬山解使愁腸能寸寸空令淚眼已斑斑  
此情不告英雄帥說向兒曹總是閑

謁金陵武帥李奘時叩殿帥為易憲章求書碑

江南無此一雄藩穩稱將軍小踞蟠韜略世傳天下少  
捷華鼎峙帥臣難狂胡要使如灰滅中國先須大器安  
慘、塵沙天欲雪北風凜、劍鏃寒

其二

搏虎屠龍兩未成蕭然華髮一書生狂蹤潦倒初無定  
老氣崢嶸自不平借馬飽遊雲夢澤歸舟小駐石頭城  
磨崖已辦中興頌洗眼西湖看北征

呈李漕

默禱神仙政隱憂天心人意已周流旱苗已槁七八月  
甘雨如期十五州風葉冷吹雲夢晚水花新浸武昌秋  
異時白粲輸官處知有豐年萬斛收

其二

塵埃破帽倦騎驢一雨窮途快有餘  
盆盎自天傾屋瓦龍蛇平地起堦渠  
冷侵絺綌覺太甚聲滿梧桐殊不踈  
口業未償詩有債夜深燈火小窓虛

喜雨呈吳察按

使君人物舊烏臺天聽雖高力挽回  
湖水欲平江為退秋天未早雨先來  
雲隨黃鶴遊何許風滿南樓亦快哉  
涼意入秋清可盡月岩知有桂花開

其二

黃鶴山前雨乍過城南草市樂如何  
千金估客倡樓醉一笛牧童牛背歌  
江夏水生歸未得武昌魚美價無多

棹船亦欲徜徉去古井而今淡不波

謁京口張守

未識諸人各已侯一麾應此滯徐州  
誰知安石恐未免欲借寇君何可留  
遺愛與山同北固平生作計豈東周  
上方已聽尚書履聲在星辰最上頭

其二

危樓年少記登臨老矣重來力不禁  
風月欲談嫌許事山川不險似人心  
淡煙衰草鄉閨遠細雨黃花節序深  
雖有小詩行樂處世無知己為誰吟

上劉和州

戟外梅花角有聲使君心與月華明  
郡當采石今衡要

船在烏江罷戰爭酒賤人家歌袴飲地寬客子帶刀耕  
太平官府無公事見說香凝燕寢兵

其二

草樹荒寒脫葉枯又尋短棹泛焦湖場經古戰心欲折  
客老諸侯飢更驅去國寂寥從白眼籌邊謀畫看洪儒  
袖詩來謁公應記曾說襄陽厠座隅

雪中呈顏使君棧升堅

一冬所欠者雪耳造物忽然如戲兒清甚牧之江上郡  
朗吟次仲館中詩試燈夜靜疎梅落賣劍村深小麥滋  
多少使君調燮意風流只有化工知

其二

陰陽舒慘剝那間刺史天高見一班人物眼中如水鑑  
世情身外不冰山滌除瑕垢與掩匿彈壓風雲俱澁慳  
羔酒帳金輪武將煮茶蕭寺對僧閑

喜雨寄徐東陽

和州昔有賢從事今作東陽父母官百里望風皆畏易  
四郊得雨及時難秋成有望米價減水滿不爭民業安  
詩事定多公事少不妨閑寄故人看

謁江華曾百里

摠衣三十年前事曾似諸生傍絳紗一國所尊吾白下  
雙鳧猶遠令江華時來館學總餘事老去衣冠懷故家  
共恠我門郊島外狂生尚有一劉叉

贈鄂渚李廣文

曾去征袍冀主恩青衫君已染塵痕故人然諾千金重  
刺史文章一代尊楚澤地多增感慨峽江天小易黃昏  
要知後夜相思處細雨青燈獨掩門

贈侯戎

江淮萬里以詩行此老曾中有甲兵何止踞鞍猶矍鑠  
試教落筆便縱橫逢時有用真才出知已不遭儒者輕  
若見英雄今馬帥為言劉子尚狂生

贈趙道卿

虬髯帽鬢虎精神大袖披三二尺巾散盡資財猶結客  
略為言語便驚人斬蛟橋下懲前失藏兔窟中甘後塵

朝士只今誰着眼顛狂贏得且安身

贈陳時可

交遊半世已公卿猶抱遺經對短檠負米過于扛鼎重  
選官難似上竿行百年母子命相倚一片忠忱誰為明  
煙火小樓風雨夜歲寒時得話平生

呈胡季解

老病顛狂藥不醫麓豪罵坐欲何為前生縱使希真是  
已死尚存忠簡知顛倒六經鸚鵡舞瀾翻一曲竹枝詞  
雖然結鞵王生僭人以此賢張釋之

簡李文

衰鬢蕭騷半欲絲尚能隨隊作兒嬉慕無殺意從人活

琴有仁聲却自悲，落魄陳平歸漢日。  
中傷張祿入秦時，諸公莫作狂夫看。  
恐是英雄未可知。

陪趙丞飲東軒留題

冠蓋如雲許後陪，酒紅醫老上吾腮。  
轉旋舞影乾坤窄，搖撼歌聲風雨來。  
漁網撒池蓮葉老，龍涎薰坐桂花開。  
翠蛾捧勸同文字，商畧西風更酒杯。

上張紫微真仙

真仙元是昔于湖，今在高樓何處居。  
霏玉不容陪偉論，撥灰猶為作行書。  
雲霞縹緲來旌節，瓊玖玲瓏聞佩琚。  
幽顯殊途人世隔，冷風吹雨送回車。

送劉從周教授

鳳閣鸞臺次第留，此生何必為身謀。  
工夫到易通三聖，潔白持身第一流。  
桑梓靜思如子少，萍蓬自嘆此生浮。  
還鄉若有過從便，會盡人間只點頭。

送劉允叔還浙東

樹倒群公尚不飛，先生於此獨知幾。  
殺身無益事成敗，閉口不言心是非。  
吳渚尊鱸張翰去，鑑湖風月賀章歸。  
從教血染長安市，一舸清風眠釣磯。

送友人得館遊南康

匏大從來速售難，依人高戴誤儒冠。  
江南又客諸侯去，梅子愁人四月寒。  
半世光陰旋蟻磨，百年舉子上魚竿。  
世間多少不平事，盍向廬山靜處看。

寄張都幹蒙正

林深葉密綠陰繁，荷漸生芽蒲有根。  
心事蹉跎過歲月，故人落莫共乾坤。  
舟行蓴菜水雲浦，路入楊梅煙雨村。  
何日扣門尋子去，一樽相對話黃昏。

寄郭德順

玉弟金昆共七人，典刑惟有此公存。  
一區未蓋楊雄宅，滿座嘗傾北海尊。  
人品細看真第一，詩篇遠寄不辭頻。  
筍輿歸路無人管，風雨瀟湘行暗村。

寄郭伯瞻

聖門力學錢公輔，盛世能書蔡伯喈。  
出處有時安義命，笑談無我見襟懷。  
桂花香滿山堂鬧，秋氣清連石洞偕。

只好放教椽筆健，留將大字寫磨崖。

醉中寄王子林

我頭扶病醉岑岑，履歷糟丘歲月深。  
行路隨身惟一劍，對花買笑亦千金。  
離鄉老去天涯淚，上冢淒其寒食心。  
風雨閉門無客過，爐香銷盡夜沉沉。

寄呂英父

清時消散坐才疎，收拾窮愁却著書。  
詩筆有神通夢寐，丰標不俗更清癯。  
黃花細雨圖江路，落日西風處士廬。  
抖擻塵埃舊時帽，不妨覓句倒騎驢。

又

秋到家山冷不知，但驚風露入新詩。  
低頭欲拜無東野。

滿耳惟聞說項斯，骨骼昂藏雲鶴瘦。  
吟哦淒斷雪猿悲，文章已得真消息。  
三十科名未是遲。

寄潘文叔

不隨千騎過淮陽，夜渡關山却一航。  
臭味偶同貧更好，功名有志老何傷。  
自甘商皓來東閣，敢怨陳登卧上床。  
欲擊單于知力倦，歸來且理舊詩囊。

寄程鵬飛

往事遊邊憶少年，未嘗携刺五侯門。  
春風躍馬漢南道，落日推牛淮上村。  
科舉未為暮年計，途窮不忍向人言。  
男兒慷慨頭當斷，未有人施可報恩。

襄陽雪中寄江西諸友

雨溢風慳夜向闌，粉花飄撲客衣單。  
功名有分平吳易，貧賤無聞訪戴難。  
懶逐銀盃行處馬，靜思玉鑑舞時鸞。  
詩成咫尺誰堪寄，當與邦人醉底看。

舟次富池寄九江諸公

既無文采又顛狂，五十餘年夢一場。  
錯認我為林子晦，也教人喚賀知章。  
樽前鶴翅從誰舞，老去槐花尚自忙。  
船解酒醒人不見，長江萬里水茫茫。

南康解后江西吳運判

一節西來已駭傳，不堪歸去便湘川。  
舟行彭蠡輕文種，酒到潯陽酌樂天。  
臺諫久無公議論，朝廷新有驟除遷。  
臣心畢竟終憂國，不敢瞻烏涕泫然。

其二

萬里西征一葉舟誰怜天地此生浮  
初征秋浦馬飛處又泊江南霜葉洲  
貧困盡從歸後見雄豪半為病來休  
十年心事閑搔首荻雨蘆風總是愁

湖口解后張伯豐同行

萬里無人獨自行得君逆旅尉東征  
聯同騎馬相先後共作詩詞迭唱賡  
僕向洞庭和雪渡船從湖口帶冰撐  
明年袍綠荊州去遇有西人好寄聲

西湖別舍弟潤之

幾度歸程入夢間秋紅社燕兩為難  
西湖半夜風雨急交泗一床心膽寒  
落第我為中酒味團橋子亟洗儒酸

臂弓抹馬長淮去莫笑狂夫老據鞍

張帥幹席上口占

海樹婆娑日出東一年窮處已殘冬  
春衫濕到西湖雨兔優覺來長樂鍾  
梅擲白英樓壓鳳燈挑紅焰劍纏龍  
便教分閭持麾去未怯平時錦繡曾

姑蘇送王武崗不值訪汪仲冕席上口占

嚴城夜出鼓鼙三畫鷁三更不見踪  
何必披雲尋樂廣真成避雨識茅容  
蘇花似雪玲瓏白臘酒如春琥珀濃  
若使世間無我輩老夫何處不窮冬

毛積夫席上口占

夜聽南窓金屈枝水花涼果似秋時人  
言愛酒陶元亮



生有能詩無本師顛倒六經鸚鵡舞瀾翻一曲鷓鴣詞  
同遊未可輕相笑恐是長庚未可知

放翁坐上

林霧霏々晚意涼野梔終盡已傳香幸哉世事日相遠  
恠底詩情老更狂蠟蟻三盃浮重碧春膏一幅研輕黃  
何如放浪形骸外盡乞江湖作醉鄉

次劉啟之韻

豪結交遊三十年暮年識子海霜邊江西析派詩同社  
鴻寶傳家子已仙無用白鬚甘我老有才青眼望誰憐  
譬如飄泊湓城下篁竹蕭疎無管絃

次張昌化合溪新亭韻

不礙溪流不平主人平處主鷗盟兩峯呈秀出天造  
雙澗同流到地清尚憶經過曾對酒欲來登覽恨無名  
仙凡咫尺紅塵隔草々題詩亦浪評

次合溪新亭韻

燕尾溪流上下分中餘里許地翻平林疎邑屋高低見  
水漲舫船來往輕坡老已仙誰傑作詩人為縣得重評  
唐山見說雙溪館今見雙溪亭又成

次呂簿池亭韻

舉盃邀月到幽塘月入波心碎夜光倒影簾花翻翠色  
飛投錦段織紅芳是中有客供千首此外無塵染六郎  
昨夕主人閑立久一身風露帶天香

次史良夫寄題雲岫

輕烟薄霧任渠行，幽壑深崖歎我生。  
變化不知天地濶，歛藏只要日星明。  
肯同蒼狗移常熟，每為鳴鳩放好晴。  
便趁風雷助滂霈，人間七節不須驚。

長干寺用荆公韻

縈紆一徑試幽尋，花竹禪房未是深。  
野水不波清欲凍，崇岡有竹翠成陰。  
琵琶昵昵怨先語，蘭麝溫溫和水沉。  
詩句欲追前輩後，誰呼粉黛汗清吟。

和都幹并柬允道

老子聲名舊白眉，客窓相疑話心時。  
相猶忘我吾無法，骨已換仙君有詩。  
尊菜羨香春冉，鹿遊臺上草離離。

一樽吊古平章看，未羨君王郡牧麾。

和印監寺玉簪花

得得尋芳聽自由，名花先占八分秋。  
鷺鷥折股晚風冷，姑射遺簪勝地幽。  
霜葉皺痕羅扇薄，香苞破處雪衣柔。  
一瓶一鉢休吟寂，騎鶴腰錢豈易謀。

詠余商卿梳子花

香不求知色自然，朝來何許雪華鮮。  
如行佛國春知識，未嫁仙姿益淨娟。  
梳子已黃猶夜雨，客遊方倦作春眠。  
地卑山迤征衣潤，不費薰爐一炷烟。

與青原正庵老

倦行老矣徧東南，最後青原識正庵。  
無法更求身外說，

有禪應許意中參春風遶寺雨華墜石鼎烹茶泉味甘  
暫脫塵囂聊稅駕與君相對款清談

簡能仁禮老

幻身到處等空虛習氣依然未掃除栢樹子邊尋祖意  
旃檀林下伴僧居三千世界初無礙十二時辰得自如  
牛糞火堆煨芋熟時時拾得懶殘餘

贈張道士

修廊行盡到山齋中有高人百念灰門外不知春出筍  
池邊惟見地生苔內丹久煉龍長在大藥將成鶴屢來  
想見年々朝玉帝眉間一點淡黃開

贈永嘉張相士

青城遊遍蜀中山歸者公卿飽已語桀驁稍能兒德祖  
興亡何關百曹參諸公富貴紙上語滿座風雷終日談  
我似北人君記取偶然留滯在東南

贈述士

一性圓明俱是佛四方落魄總成仙逢人只可少說話  
賣卜不須多覓錢退一步行安樂法道三箇好喜歡緣  
老夫亦欲挑包去若要相尋在酒邊

夜思中原

中原邈々路何長文物衣冠天一方獨有孤臣揮血淚  
更無竒傑叫天閭關河夜月冰霜重宮殿春風草木荒  
猶耿孤忠思報主挿天劔氣夜光芒

題鳳凰臺

公子飄然有俊才此臺翻覺在塵埃  
江淮浩渺洲渚沒鳳鳥寂寥鴻鴈來  
時事不言惟拄笏書生無用且啣盃  
生平自厭曾中窄萬里霜天一日開

題池州一覽亭

塵土中無絕妙詞不能重賦翠微詩  
淋漓醉墨揚廷秀慷慨悲吟杜牧之  
巖壑尚多吾足倦江山信美客歸遲  
夕陽鴉點城門閉堤上鞭垂萬柳絲

題高遠亭

戊古城荒地勢雄一亭分半庾樓東  
廬山面目今真識江漢朝宗此會同  
司馬宅荒惟苦竹元規塵遠尚西風

胡塵只隔淮河在誰為長驅一掃空

賞心亭

何人將我此來遊白鷺那知客有愁  
如子矜持山玉立似予迂濶水盤洲  
塵襟抖擻風雲八石刻磨娑歲月流  
惆悵謫仙鸞馭遠離去別恨黯灘頭

龔山長棲閣

柳徑參差小葉藍不知世有府潭潭  
楊雄宅就巢枝一去病家寒繞樹三  
從史諸公時爛熳勸酬終日酒醺酣  
出門萬里江邊去塵滿征衫我甚慙

南康天開圖畫樓

樓外烟波渺去鴻樓頭廬阜翠摩空  
故知造物鋪張巧

不費丹青點染工赤壁江山橫夜月  
鞦韆亭館卧秋風  
祇今滿地魚圖盡盡在西灣香靄中

建鄴酒樓落成預點燈

高樓百尺久摧頽輪奐重新亦壯哉  
徹夜笙歌催臘盡  
賸天簫鼓挽春回都人雜沓揮千鎰  
我輩登臨謾一杯  
京國繁華欣再覩老來醉眼更堪開

洞霄

杖藜乘興到瓊宮滿目幽奇景莫窮  
山鎖九層雖極遠  
洞庭五處自相通侵雲天柱籠朝霧  
傍水清陰弄晚風  
可惜春禽啼曉月又催行李過江東

同許從道登園翠閣

清潭石洞遊俱徧最後來尋此閣  
邀樹木滿林成庇蔭  
溪山圍縣恰周遭結交有味貧何害  
薄酒雖村飲亦豪  
明日重陽吾未去更于何處可登高

同郭殿帥遊鳳山寺探桃李

廉纖小雨久于梅喜得新晴亦快哉  
五色波光麗鷓鴣  
十分雲氣近蓬萊旌旗側畔宮墻轉  
戈戟叢中武庫回  
走馬看花生怕晚果然桃李一山開

雲晴遊惠山

松杉如立密常門長在山中管送迎  
接石草根留雪在  
響塔簷溜滴春聲簿書撥置君能到  
碑刻摩娑眼倍明  
欲作小詩無好句只題年月記經行

遊窄萼山

倦遊華髮老飄飄，意氣依然在九霄。  
努力尚能登窄萼，廢詩無可寄參寥。  
欹斜古寺雲為屋，穩帖溪流石架橋。  
安得柳間桃李動，丹青吾欲盡生綃。

登白雲絕頂

雨罷新晴怯宿寒，一簾秋色滿闌干。  
欲窮大地三千界，頓上高峯八百盤。  
累世避人秦父母，一時驚客漢衣冠。  
塵寰元有清吟處，便作三山蓬島看。

登清涼臺寺

江南江北許多山，到處登臨得凭欄。  
老木漸丹霜有信，怒濤衝岸水生寒。  
倦遊半世烏三匝，往事千年指一彈。

落日正西催上馬，依了回首問長安。

又借韻小行

杖屨尋詩問所由，一天草木葉知秋。  
天依雲淡村都好，兩過山深物自幽。  
班駁岩頭苔蘚濕，鈎斲樹尾鳥聲柔。  
眼前不見市朝事，始笑從前利祿謀。

大麓道中

竹輿鴉軋曉烟收，蒼玉岩崕萬里秋。  
路轉羊腸回草徑，溪分燕尾逸沙洲。  
愛山有癖須還債，覓句無工是不休。  
晴得幾時尤更好，桂花蓓蕾作針頭。

登凌雲高處

攝衣更上一層樓，終到層霄最上頭。  
方識乾坤真轉轂，

好知身世付虛舟  
九秋草木嵐烟濕  
萬里山川海氣浮  
更欲杖藜窮望眼  
中何處認神州

過泰和宮

林塘漠漠亂花飛  
門掩蒼苔過客稀  
蝴蝶與身俱是夢  
杜鵑憐我幾時歸  
徐行便當盤輿穩  
清話何妨羽扇揮  
四十九年蓬伯玉  
此生畢竟是耶非

過西興

奔濤洶湧欲騎鯨  
船去錢塘棹子停  
何日子看鞭楚墓  
傷時周顛泣新亭  
蚊蟲過耳蠻音恐  
鯢鱓薰人海氣腥  
吳下阿蒙非昔日  
眼高相對有誰青

遊北墅

客裡浮沉又一年  
春風北墅故依然  
路邊花有香相引  
澗下松無色可憐  
仙鶴舞隨人擊筑  
神鴉飛傍客歸船  
何須故掃霜前葉  
却趁東風學曉煙

呂氏山堂喜雨

涼滿蒲萄磊落枝  
倦遊來此亦忘歸  
溝渠水活龍蛇動  
樹木月明烏鵲飛  
欣減黃梁新米價  
愁生白苧舊征衣  
風流却扇團圞坐  
一夜談兵玉麈揮

雨作妨登山

莫笑林宗折角巾  
兩師堅壁助愁城  
菰蒲乍冷橫煙淡  
鷗鷺驚秋立水輕  
山勢欲窮猶有路  
溪流似斷又聞聲  
好懷聊擬携筇去  
政愜農夫荷笠耕

又

暑風快處岸烏巾去，扁舟遠帝城。過眼溪山含霧重，  
多情草木逗煙輕。琴書政要踈人事，禽鳥楚然聽履聲。  
莫恨漏天霖雨惡，鷄窓好，筆為耕。

又

杖屨飄然不整巾，緣何問得梵王城。淡煙翠濕千螺皺，  
微日烟銷一紙輕。隔山鳥語如人語，觸處風聲若水聲。  
見說一犁今已足，笑歌蓬首餉夫耕。

掛搭松窩

十年南北走東西，豪氣崢嶸老不衰。快斬妖魔三尺劍，  
朗吟風月五言詩。山無福地吾焉往，神有靈丹世不知。

却恐松窩知此意，一包掛搭更何疑。

鹽官權學

人生百歲等歡悲，已判行藏任所之。筆硯重尋驚夢竟，  
課程聊復伴兒嬉。荒原傍海多閑趣，閉戶觀書有倦時。  
破帽塵埃人已矣，不妨更借蹇驢騎。

鹽官借沈氏屋

借宅西頭對短檠，一燈相對紙窓橫。煨爐火活蹲鴟熟，  
沸鼎茶香蚯蚓鳴。萬卷讀書空老大，諸生蓋世盡功名。  
依稀草木還鄉去，更向夜深聞雨聲。

入徽州

白傳庭前正解船，夢中忽已過番川。紅塵冉冉行天上，



黃道駸子近日邊石洞歛溪俱可硯山肥徽路總堪田  
採茅便欲僑居去柰此功名未了緣

寓公坊

秋風漸々正吹涼似報歸期未欲忙尋路竹間深入寺  
泊船沙外遠依庄小槽壓酒珠紅滴新飯炊粳雪白香  
更聽夜來思遠浦軍聲十萬似錢塘

六合道中

十年曾此記來遊有策中原一戰收蒲柳易凋嫌勢去  
金湯無用卒和休悲風髣髴鳴刀斗缺月參差照敵樓  
廟食封侯何日事不堪老馬又滁州

醉中偶成

小院蒲萄月架東舞腰忙越鼓聲雄詩成綵筆分題後  
人在金釵賭令中秋葉冷吟風浩蕩晚林烘透日玲瓏  
腰間若佩滁州印定有人呼作醉翁

無錫道觀

門外紅塵市一塵買瓜買李興悠然樹根石透月灑落  
殿閣屋多風折旋賣墨道人勤置酒能詩老子欲飛仙  
觸髅南面蛆虫輩鵬鷃逍遙各自天

招義銘育王見佛照

豪傑書生勝散仙小庵藏迹得安閑禪魯勘破諸公去  
詩在推敲一字間夜雨滴殘梧葉老夕陽行處水花慳  
買舟便欲乘風去孤絕同遊海島山

金陵雪中

風幻寒威夜撲人  
曉看雲脚四垂陰  
收蕪塞上功名淚  
騎馬藍關竄逐心  
冷面不春愁菟結  
凍鬢如鐵恐蕭森  
盡爐醉撥灰為字  
不為閑思暖帳金

對雪

匣中雷吼一長劍  
溪上月明多少舟  
無賊可平閑李愬  
有人不訪倦王猷  
銀盃綉帶從渠便  
瑤樹瓊林得自由  
衣弊獨嫌灰絮料  
簾高想見月垂鉤

觀白鷺州風濤

一聲雷鼓挾風威  
頃刻衝濤沒釣磯  
行客駭看銀漢落  
陽侯驚起玉山飛  
蛟龍便爾爭先化  
鷗鷺茫然失所依

安得長竿入吾手  
翩然東海釣鼈歸

借陳調翁龍山買舟待夜潮發

來逢春雨長魚苗  
去見秋風擘蟹螯  
久矣歸心到鄉國  
依然水宿伴漁舸  
一天如許皆明月  
二客所須惟濁醪  
今夜四更潮有信  
更須留眼看銀濤

發舟

寶氣亭前首問途  
清颺日送蘆葭舟  
楓無處不愁客  
白鷺有情如導吾  
青竹閑垂任子釣  
紫鱗時掣季鷹魚  
烟波渺江天  
晚水宿又聽溪鳥呼

舟中偶作

日：拖舟上碧溪  
寒灘水淺草離離  
尺書鴈斷歲行盡

五兩風輕帆去遲白鷺導吾如有志丹楓愁客亦何為  
閑頭要趁梅花約更著寬程五日期

舟中

下水南風未覺難我舟不動穩如山東西日月尋常事  
變化煙雲頃刻間沙鳥似鷺皆退避林鬱如畫亦渾閑  
歸期只欲長安近屈指何時到此關

霜寒舟中

展轉牛衣冷不禁著人無奈曉寒侵由來十月清霜重  
况乃荒村白露深有客分金來橘社何人塗血染楓林  
不堪青女來料理折盡衰翁一片心

春日即事

久客無人問所須小窓翻得遂癡愚黃昏以後酒三盞  
白日之間飯兩盃穀兩筍茶俱俊美條風祀菊競甘腴  
先賢且謂可復賤况是平生山澤臞

又

出門雖是欠陶朱便使閑門亦可居物價甚廉常食肉  
傭資極省易抄書已安櫟社知無用若比叢林似有餘  
歸與未歸天上事只消如此看何如

幽居

對面滄浪可濯纓不思泛舸出春城浮沉粉社何人重  
俯仰茅簷是事輕玉蓋連屏寒徙倚蒲萄上架月縱橫  
江湖老矣無他願只欲清陰便得成

自述

扁舟送客出姑蘇  
晚泊吳江夜雨餘  
波浪稍平風力定  
青黃相間橘林疎  
匆忙亭館催行酒  
草率盃盤旋買魚  
與我壁間書歲月  
無人為作小玉書

自述

精神凋耗鬢毛衰  
劫火光中第幾回  
無可奈何教老去  
有時猛省忽愁來  
來師崇道學元非偽  
客寄蘇州却類猷  
明日重陽又佳節  
得錢且醉菊花盃

自慚

一榻留人去便垂  
自慚非友亦非師  
初無伎倆惟貪酒  
遇有工夫或賦詩  
驪日棗林紅磊落  
響風梧葉碧參差

人家正做鱸魚膾  
老子秋來却自悲

下第

蕩：天門叫不鷹  
起尋歸路嘆南行  
新亭未必非周顛  
宣室終須召賈生  
振海潮聲春洶湧  
揮天劍氣夜崢嶸  
傷心故國三千里  
纔是餘杭第一程

歲晚

手種疎梅已發妍  
相從三過客中年  
吾生豈得須如意  
隨處何妨且信緣  
風月心多時小醉  
軒裳夢少且閑眠  
萬人海裏能如此  
是自在禪并散仙

代上韓開府

位貌鈞樞等元勳  
闕闕傳九重新  
洗日一柱獨擎天  
戟

守籌帷外遷除化筆邊衣冠圍盛事不記幾貂蟬

上周少保

游戲公孤了歸來不愛名昌黎前進士司馬老先生有  
節花宜晚無波水自平翳雲遮不得南極益精明  
早被儒冠誤依稀老更侵科名數行淚岐路一生心自  
哂亡猿木誰怜躍冶金使無鍾鼎志何地可山林

初伏關上書得旨還鄉上揚守秘書

郡大廬陵古分符得秘卽息爭民珥筆課最米連播水  
隔蓬山遠風凝畫戟香少湏官事了歸去玉為堂  
百計歸無策誰知禍有胎江河周顛泣城郭令威來訪  
舊鬢俱白過家心欲摧故鄉非不好不是錦衣回

上范秘監

郡大當塗古分符得少蓬威如烏府在令與綉衣同鈴  
閣細書外花村賣劍中少需撫摩意來作玉堂翁  
疇昔經行路黃山更一過天涯知己少歲晚客愁多路  
斷車生角冰堅水不波使君森畫戟聞此盍如何

寄周益公

猥賤詩難化謹囂語不齊長途難短堠小而易深泥逐  
利如爭鹿傷人類割雞心雖懷益國夢亦畏江西

和大參相公

松深煙鎖逕月冷水明樓日漲滄溟窄山陰古木秋琴  
書超物表氣宇識神遊突兀東南壯乾坤第一流

氣壓三千界雲橫百尺樓地靈絕興替木老閱春秋杖  
屨逍遙處琴書汗漫遊利名空役役回首愧禪流  
山邃龍蟠窟江昏蜃吐樓撞鍾千百指閱世八千秋僧  
笑衣冠累天容杖屨遊松梢清影碎薄月帶沙流

和子純韻

橋下水如箭驚奔萬古號溪毛翻碧帶石蘚襯銀濤天  
外千層秀雲低數尺高垂：興偏惡蓬鬢為詩搔

贈劉叔擬招山

不醉何勞飲無詩底用吟百年為客老一念愛鄉深草  
路青原淚煙波白鷺心班超歸未得想見舊家林

送楊伯子

天下少奇士况乎吾一州逢人問姓字知子有源流蘭  
砌多黃口蓬山半白頭誠齋知未可喚作小坡休

送金陵胡撫幹仲方

故家凋喪後初識澹庵孫玉樹明庭角冰澌吐話言荆  
州得上幕楚壤帶中原我欲附舟去白魚朱橘繁  
共醉百斛酒千金一笑傾寄情桃葉渡弔古石頭城戰  
守籌雄地更番出戍兵甕天留不住圖略遂西征

都中留隨州李判官

幸自東南好西歸未可忙茶添橄欖味酒借蛤蜊香絕  
品宜春醉新烹趣日長倒囊煩厚載歸遺北人嘗

江頭送趙教即席同賦

東州二三子相送黃鶴磯  
渭北煙樹合江南春水肥  
波寬魚意足沙淺鳥痕微  
我亦欲東去斜風雨濕衣

送許闇二兄歸岳陽

岳鄂舊遊處重來歲月更  
聯翩識吾友邂逅慰平生  
風送故人遠槐催舉子驚  
扁舟更珍重萬里莫留行

九日寄陳君舉舍人

白髮江湖暗青燈几席涼  
病身幾千百佳節又重陽  
命也吾何柰天乎孰可量  
元龍樓百尺猶得慰行藏

除夜寄盧菊磻

見說盧夫子詩成手自書  
雪便金帳暖雲蔭玉川居  
椒葉儲名酒萍蘂薦野蔬  
夜寒裊犢鼻應念馬相如

寄桐廬程宰

路入嚴州去桐廬得暫過  
盤飧湯餅賤機杼綺羅多  
令尹哦詩治居民酌酒歌吏人  
公事少門雀可張羅

寄吳子雲

曾是仁軒客飄零老更窮  
棹船秋葉浦策杖桂枝叢  
往事都如夢新詩不用工  
草廬消得幾不許卧隆中

吳尉東閣西亭

襲桂行香徑朱欄稍轉西  
水風颭石冷雲月墮簷低  
棋敗深杯罰詩豪健筆題  
舞忙釵鬢亂更為捧柔荑  
石板橋東閣軒窓如此華  
碧虛澄水鑑紅影侵霜花  
似串歌雲駐如泥醉帽斜  
但驚風露冷飄落忘還家

湖口宰任伯厚挹清亭

政笑行役倦登臨心眼開舒蘄千里見蜀贛兩江來老  
覺樹如此涼生風快哉主人方好客不笑酒行杯

題龔山長樓閣

愛客龔山長能容日：過栽培初種竹愛護在生荷堂  
對青山短門閑白日多細聽閑議論不似我狂歌

題禾川龍飛英䟽榮閣

堂扁朱書字何人可得之三衙新統帥六館老宗師文  
武無窮意江山不盡詩親思如可報會有報君時

題黃文叔燕堂

仕宦不愜意有家胡不歸林棲鳥友哺梁語燕于飛鷗

鷺忘之久貂蟬貴者希但存慈母健日：舞班衣  
着屋圖畫裏四山樓觀重尊添張翰思橘當李侯封湖  
水自平淡花枝多冶容興來詩已就只可酒千鍾

西湖次舍弟潤之韻

舊說西湖好春來更一遊林逋山際宅蘇小水邊樓行  
密柳堤開樹多花影稠天堂從此去真箇說杭州

雨華臺次胡仲方韻

寒意濕烟草浮生吹浪花繞臺皆峻嶺陳迹一飛霞子  
醉辭吐鳳吾狂字落鴉兒童應笑客風颭角巾斜

酒樓

夜上青樓去如迷洞府深妓歌千調曲客雜五方音藕



白玲瓏玉柑黃磊落金酣歌恣蕭散無復越中吟

登曠軒

去春曾與客携手過橋來寺蔭松極美塢深桃不開紅  
塵萬里去白首一年回淨洗曠軒眼雪天閑看梅

鐵塔寺呈輕老

樹木有古意軒窓多野情斷岡城一帶齊岸草叢生醉  
骨風蟬蛻病身沙鳥輕惜無東野筆琢句關僧清

同曹元章遊新安寺

畏暑倦杯酌脩廊散步行寺深藏古意蟬老帶秋聲去  
就諸緣薄窮通一念輕更尋水清處為我濯塵纓

遊古山

信步作幽討有庵如此深佛燈明老屋秋日淡疎林栢  
樹祖師意松楸老子心十年棄墳墓洒淚一悲吟

題古山庵

薄醉來遊此西風吹帽紗倦鴉叢密樹涼雨濕秋花題  
壁人何在哦詩句未加一杯湯餅具坐到日西斜

題龍華寺壁

春事梅邊動荒江信馬行久窮知遠舉多瘦怯衣輕今  
日龍華寺昔時黃姥城廢興吾已解一醉萬緣清

題鴈汭峯東林寺

鴈汭泊船去岸頭閑訪僧故人留少駐俗子見何曾佛  
屋擎天柱心光續命燈任渠狂到死吾老慢騰騰

書高塘庵屋

庵上木已拱山前水可陂崢嶸晦翁字突兀大參碑雲  
葉孤飛白鳥群反哺慈傷心前輩盡問道欲從誰

幸追庵題壁

路轉羊腸曲山藏蝸角深樹多成蔭密水少亦悲吟露  
草重陽淚風花寒食心摩娑墓銘看久立讀碑陰

元宵偶書

磊落東遊客磨跣且過僧有懷千不足自顧百無能舊  
日名城酒他時夢境燈放歌聲激烈醉倒睡騰騰

寓東陽

元帥東陽主令君吾故人可憐九華客猶是一窮民古

者狂狷士人間自在身化工都不管何地有陽春  
不學老無似艱難却飽語遠從陶靖節來訪杜征南意  
到羹藟適貧猶食薺甘惜無廬可卧尚遶鵲枝三

泊船吳江縣

草樹連塘岸人家半橘州煖寒尋酒去覺懶罷詩休逆  
境年々夢勞生處々愁天涯倦行客明日又蘇州

送客剡溪

送客山陰路春風散馬蹄縱觀神禹穴深入子猷溪嫩  
草綠於染珍禽嬌已啼去程千萬里步々有雲梯

關景初進納長安相值於西采石話及家事因與

對酌

未有還家策故鄉吾太和龍洲沙石健快閣水雲多場  
屋科名累江湖歲月磨第紫一杯酒相對柰愁何

方竹杖

鶴骨風前瘦龍姿雨後鮮鋒稜四面峻節操一生堅荷  
蓀行隨適看山倚最便從教方有礙終不效規圓

挽蘇吏部

奕世徵文獻逢時仕學優愛遺邊郡在官止外郎休月  
黑新塋夜溪橫舊隱秋從遊老賓客欲替二孤愁

挽拙庵楊居士

尚憶龍蟠國城西作客時有山皆載酒無日不賡詩風  
雨交遊散江湖淚眼悲百年心事在只有鳳雛知

二

前輩晨星似如公抑又希榆邊遊已倦菊徑挽方歸聽  
兩風全老冲天子欲飛傷心彈指頃一夢故人非

寄沈仲居時進三國志

十年鉛槧髮絲秋獨抱成書四海遊三國諸人應夢裏  
一番公案又從頭  
萬死中原百戰爭流芳遺臭各垂名思量陳壽已饒舌  
又費先生一管城

寄張東之

見山堂上山如畫二十年前曾客來風絮滿城歸不得

江南老却賀方回  
紫駟借得將軍馬  
垂柳西湖第一橋  
欲傍酒家做寒食  
腐儒何日有狐貂

簡胡衛道

淮北山南幕府開  
江淮誰念有遺才  
出門萬里長安道  
乞我於潛馭馬來  
結束弓刀鞍馬間  
精神矍鑠我猶頑  
褒衣博帶休相笑  
前帶頭巾金帽環

逸無錫見李元德祭酒

新變文章學未成  
青雲無路致吾身  
應逢塾角諸生笑  
欲效林宗却整巾

上益公十絕為壽

金翰振曉近天威  
玉宇循環晝影遲  
曾上大裘頭上看  
煖然可愛是冬曦

右金烏

雲淡星疎月有光  
廣寒仙府歲偏長  
多應自製延年藥  
振古長同桂子香

右玉兔

納錫曾看上九江  
又聞詹事奉儲皇  
巢成荷上規仙景  
左顧溪中賜印章

右宝龟

緱山橘井與青田  
驅策風雲友列仙  
名號橫空心萬里  
九臯聲動九重天

右元鶴

年來曾聞葛稚川  
玉京何處錦紋鮮  
賞花應制嘉賓宴  
小雅當為第一篇

右壽鹿

少壯東堂奏捷功  
浮香仙籍繼家風  
年々占得中元景  
一顆冰輪照九穹

右丹桂

枝如華蓋聳瀛洲  
永世香風在  
苒苒浮時有  
群仙來拜節  
細聽鳴鳳碧枝頭

右影木

冰條雪葉節高堅  
臺憲風生凜々然  
可羨堪為棟梁用  
至唐千載尚三千

右古栢

壽客尤宜在壽鄉  
鈿花的皜傲新霜  
更歌華壽今歸去  
尚有淵明野趣香

右佳菊

東封已受大夫封  
又入丁公吉夢中  
祇道濟時作舟楫  
茯神尤有濟人功

右蒼官

代吳守與趙侯為壽

地蟠江漢節巋然  
勁氣扶輿幾倍年  
白玉卍砂浩無數  
夜光隨處見山川

氣運由來有盛衰  
循環久矣見天機  
黃山雲散無塵滓  
上將騰光入紫微

虎頭燕頤足竒謀  
玉帳兵形象水流  
此去關河應不遠  
上方擬築望英樓

文偉當年記鄂城  
崎嶇蜀道播英聲  
何如衣錦粉榆社  
卧護元戎十萬兵

夜上南樓望玉京  
將星光底壽星明  
不須便即騎黃鶴  
且為皇家致太平

呈徐侍郎兼寄辛幼安

當年今日誤承恩自倚容華託至尊  
門外遊絲難駐日依然青草暗長門  
狼臂將軍戰不休當時部曲已封侯  
夜深忽夢燕山月猶幸君王晚更收

官舍阻雨十日不能出悶成五絕呈徐判部

學弄筆頭兒戲事風流眼底亦無之  
汪孫已往周洪沒本分作家今是誰  
竹隱先生名滿世自為舉子已詩聲  
春風若入五花判莫遣紫薇紅藥驚  
秋霜烈日生前操流水行雲意外詩  
未必中興四君子於斯二者更無之

潦倒傍門羞騎馬倦游老欲寄崑留山  
將造請躡嚙口慷慨狂歌泉石間  
世間別有人才在臺閣招徠恐未多半老  
江湖半巖穴為公一賦草廬歌

呈稼軒

精神此老健於虎紅頰白鬚雙眼青  
未可瓢泉便歸去要將九鼎重朝廷  
閉門翹足觀山睡松檜鬱然雲氣高  
說夢向人應不信碧油幢下有旌旄  
書來賜以蘭溪酒下視潘葑奴僕之  
吾老尚能三百盞一盃水不直吾詩

卧廬人昔如龍起，鼎足魏吳如等閑。  
若結梅花為保社，林逋只合住孤山。  
書生不願黃金印，十萬提兵去戰場。  
只欲稼軒一題品，春風侯骨死猶香。

投誠齋

省齋去國良齋老，不獨宣尼嘆乏才。  
試數諸公有名者，廬陵那得兩誠齋。  
蓬萊東觀是亨衢，經國文章要鉅儒。  
頓着五花猶不判，却於注易下工夫。  
畫戟門邊春晝長，鼎新模範宿淮陽。  
吏人候眼報公事，一辦濃薰斑馬香。

智愚上下爾自異，尺寸不差公短長。  
畢竟昌黎仍舊好，何曾人說段文昌。

綾衾殿八承明直，却把一麾江上未。  
雲氣隔天迷望眼，不堪花落幾宮槐。  
夫子聲名魏浙西，作成文士欲何為。  
達人曾次元無翳，芥子須彌我獨知。  
初政寰區望太平，黎民樂業喜更生。  
裴公用舍無輕重，天下從茲有重輕。

上吳居父

時平無事清吟好，衛霍貪功未足奇。  
爭似一篇人贈灸，四方傳誦卧龍詩。

廟堂陶鑄人才盡流落江淮老病身尚踏槐花隨舉子  
不知鄧禹是何人

呈玉山父

疎烟淡々樹重々略得西南有路通  
鍾板不鳴山寺靜  
閉門人在月明中  
辦得茅廬我便歸  
玉堂何處有梅枝  
歲寒老樹雖荒寂  
會有臘殘春到時

和危府教三絕

先生場屋文之虎氣懾狐狸  
自不知老去莫嫌官尚冷  
灑橋風月要新詩

天上群仙臺望居  
芹宮未是辱泥塗  
莫耶變化須臾事

一點一鎔金在爐

行脚諸方履歷深似禪  
和子寄叢林試拈朝報一轉語  
以道觀之無損心

送胡仲方

略無一物將人意更逐行軒去  
似飛騰把清吟供惠送  
聊將遠出當依歸

鄭公句在貧何恨劉毅家寒淚  
一揮窮達莫言鄉義重  
此行畢竟是耶非

贈經長老

菜肚老人禪已飽  
愛人從史作詩僧  
客來無處着歡喜  
一語不曾談葛藤



題自然足軒

秋光萬斛潑踈簾瘦玉蕭蕭：拂盡簷鵲尾爐中香篆冷  
矮窓袖手對楞嚴  
翠竹無多第一奇政憂喧聒俗人知清風自足老僧用  
只是窓前欠好詩  
有竹無生不費鋤停：楚玉影癯：風師自是識人意  
何用縱橫十萬夫

題東林寺

爾自貪癡不肯閑江南多少好青山老夫為不愛官職  
買得狂名滿世間

書越州能仁寺壁

流年轉眼一飛梭如此頭顱柰老何狼籍落花春不老  
竹雞啼處雨聲多

書僧舍壁

綠楊染水濃如畫天氣欲晴風自和二月杏花猶未放  
一春分外覺寒多

西林庵

雪汁融：溪棹回此山林竹亦佳哉看殘未了槐巖在  
筍蕨肥時又一來

山末

山末踈紅尾：霞晚烟叢薄是人家移船更喜吹香好  
狗摘花開媚淺沙

遊清潭呂資益蟠谷十絕

一潭清淨水無泥潭岸無泥石更奇擬待月明垂釣去  
前溪雨足怕龍歸

右清潭

逶迤路逐驚蛇去轉盼不知身已高雪積萬層山四合  
碧油幢外有旌旄

右蟠谷

野花紅白倚巖開只可臨風自一盃謹莫放教公子見  
恐携窈窕入籠來

右飲綠

老子垂々秋露下九月空山天氣寒黃花剝開且勿剪  
留得一秋烟雨看

右初秋

香不求知色正青青於九畹見飄零山中若有離騷伴  
痛飲吾知勝獨醒

右吸羨

帝所森嚴寂不喧九閩虎豹守天門何人奏事含風殿

日晏鳴珂下紫垣

右藏玉

濕雲將雨過溪東石澁灘鳴水勢雄忽作晚晴秋更好

月來林外透玲瓏

右舍輝

一花帶蕊香氣滿何況叢生樹兩行風露益高秋雨足  
請君來此撼琳琅

右香徑

窮廬架屋石稜層香火西風只一僧日晚課經猶未了  
閉門先點佛前燈

右谷菴

前山崛起青蓮朶色掃晴空如葉開若擬空花猶未了  
空中安得有峯來

右碧蓮峰

三登徑山而雨或曰龍王相迎予笑而戲以詩

細雨霏：洒路塵龍神有意迓嘉賓  
世間小節成姑息  
盡念熬焦烈骨人

遊古仙巖

白蘋風裏步清秋  
來作靈巖古洞遊  
笑倚飛雲訪仙迹  
又陽無語伴人愁

欲遊閣阜山

仙梯難上塵緣重  
俗駕勒回山有靈  
烟靄模糊雨昏黑  
數峰疑在夢中青

西湖

西湖：上山如畫二十年  
前魯客來飛絮滿城歸未得  
江南老却賀方回

湖上

五行捺我到錢塘  
花底題詩句亦香  
莫惜高吟三十韻  
敢煩詩伯為平章

弋陽渡頭

車聲盡日滑黃泥  
怕聽空桑叫竹雞  
風雨不知春早晚  
柳條搖綠半江垂

初八平氏書院

雪屋彈琴泛作聲  
寂無人語紙窓明  
倦遊識破諸緣妄  
心與梅花一處清

湖口阻風

冒雪衝霜已十程  
狂風乃敢厄吾行  
無人說向江神道

莫待明年却世情

蘄州道中

如箭陰風劈面吹  
雪花斜夾雨垂垂  
曾中自有平戎策  
路入蘄州冷不知

自宣溪過早禾渡

雨後斜陽未見晴  
曉看紅日報窓明  
筓輿十里宣溪路  
剗地濃雲脚裏行  
梅欲攬春菊送秋  
早禾渡口晚烟收  
風從灘上催船過  
袞起寒沙一併流

釣臺

百尺難量大丈夫  
問他出處意何如  
乾坤已付劉文叔

從此先生歸釣魚

龔山長樓閣

不知此是何人宅  
楊柳雖底屋却高  
見說圖書皆仗物  
六經之外有離騷

村店

林深路轉午雞啼  
知有人家住隔溪  
一塢鬧紅春欲動  
酒帘正在杏花西  
溪邊猶棹酒船回  
冷水灣頭雨意開  
一路有詩吟不穩  
當初悔不共君來

春日書事

薄雲籠日護初晴  
沙岸潮來春水生  
閑傍柳堤騎馬去

一鞭春色柳風輕

春歸

百花开盡到酴醾一片春心又欲歸可恨東風留不得  
謾教啼鳥怨斜暉

和送牡丹韻

娉：嬋：洛陽花合在瑤池阿母家乞與老人渾不愛  
白髯相對鬢烏紗

萱草

不盡人間萬古愁却評萱草解忘憂閑花若總閑憔悴  
誰信浮生更白頭

梅花

人間不盡春來意恰一枝梅更踈待得和羹幾時在  
祇今風月上新除

香氣惱人休不得荒林月裏夜相過花應笑客有底急  
客若不來花柰何

凍雲垂：雪欲落兩澁風慳如此寒分折南枝與君看  
老夫自要比枝看

高門拂日瓊為樹呼我不來那肯過不知此花有何好  
寒鄉日：用亡何

寂無人語斷回程日落未落孤山橫平湖水闊何許去  
傍竹邊松自好行

雪

醉枕醒來夜未央  
倦身展轉壓黎床  
映牕色皎猶疑月  
刮骨寒知不是霜

喜雨

誰借長鞭策懶龍  
黃梅水漲舫艫通  
還知君子憂雨切  
常在桑麻稼穡中  
北方旱氣與兵連  
猶恐淮州亦蔓延  
數日下田新雨足  
不應千里不同天

聞杜宇

杜宇幾聲烟靄外  
相思只在蜀山陰  
閑愁不共花飛盡  
贏得傷春一片心

聞鶯

東風扶日上花枝  
恰：幽禽弄煖時  
百轉忽驚春夢破  
間關石上語相思

鴈

朝隨漢使到天涯  
暮與江鷗宿浦沙  
歲晚客途營一飽  
稻梁多處即為家  
萬重山水萬重雲  
歲：江南客此身  
天末西風晚來急  
數行飛下一汀蘋

漁翁

短篷三尺寄烟波  
短褐休：歲月過江海  
不知戎馬事  
酒酣搔首唱漁歌

聽阮

絳蠟攢花夜氣橫樽前更著許風情却將江上風濤手  
來聽紗窓側阮聲

閑步

山徑無人鳥篆沙杖藜閑看摘新茶錦綉委地筍翻籜  
黃玉滿林松帶花

夢覺

夢回斜日轉花陰時有黃鸝送好音高卧草廬人不識  
東風啼鳥獨知心

感舊

羅結同心柳帶青碧桃香裡記將迎春風重到憑欄處  
腸斷江樓不忍登

遊郭希呂石洞 缺一

清曠

筍輿咿啞來路轉此歇脚長風挾秋下深意滿萬壑

深秀

蒼髯萬松宮窈窕一徑開請回俗士駕切莫呵殿來

書院

力學如力耕勤惰爾自知便使書種多會有歲稔時

谷口

水流自何許遠欲窮其源石梯苔蘚層微有屐齒痕

月峽

兩崖限東西裏有一帶天老蟾更多事駕月下潺湲

挂壑

叢：萬橫板羅生雜松篁不以巖穴幽歲晚政自香

小爛柯

戲游一彈碁歲月駒隙過不如兩忘機石上跏趺坐

傾月

去：山轉深樹下益淒冷時有月烏飛間碎梧桐影

闕雲

仙官已降勅雅有新遷除乞為此閣使雲物屢卷舒

高碧

小山碧巉岩直上與天齊詩成欲磨崖藤蘿費攀躋

石井

銀床遶周遭一規寒浸水試敲拄杖看恐觸蛟龍起

壺天

逆溪隨水行更上紫翠峰朱欄忽飛閣映帶烟霞重

玉佩

借榻卧雲屋敲枕子細聽誤疑鳴珂聲不知水冷：

飛雪

山前大雪飛路自何處入蒙茸六花亂冷澣征衣濕

笙鶴

木末俯清軒獨立久延佇何人騎鶴來髣髴吹笙侶

韜玉

至寶不自獻韜藏亦英華餘香被草木秀擢幽岩花



倚劍

石間自塵礪三嘆不用久如去到人間為儂洗磨垢

藥圃

古文不可賣未覺賣藥非侵晨荷鋤往暮得芝朮歸

玉泉

石礫沙汰盡悠悠潭影斜塵襟不忍濯為惜無玷瑕

獨醒賦

有貴介公子生王謝家冰玉其身委身糟丘度越醉鄉  
一日謂劉子曰麴蘖之盛弃土相似釀海為酒他人視  
之以為酒耳吾門如市吾心如水平獨不見吾廳事之南  
豈亦吾之胃次哉矮屋數間琴書罷陳日出內其有餘

閑散疲於一伸摩娑手植之竹枝葉蔚然其已青此  
非筦庫之主人乎其實超衆人而獨醒劉子曰公子不  
飲何有於醉：猶不知醒為何謂若我者蓋嘗從事於  
此矣少而桑蓬有志四方東上會稽南窺衡湘西登岷  
峨之巔北遊爛熳乎荆揚悠悠風塵隨舉子以自鳴上  
皇帝之書客諸侯之門發鴻寶之秘藏瑰乎雄辭而偉  
文得不踰於一言放之如萬馬之駿奔半生江湖流落  
齟齬追前脩子不速途益遠而日暮始寄於酒以自適  
終能醜醜而涉其趣操危執瓢拍浮酒船痛飲而談離  
騷白眼仰卧而看天雖然此持其大凡爾有時墜車眼  
花落井顛倒乎衣裳弁我側而不整每事盡廢違昏而

盡省人猶曰是其酩酊者然也至於起舜將鬻不遜罵  
坐芥視天下之士以一豪為螟蛉與螺贏此謗怒或  
賈竒禍矧又欲多酌我今者不然我非故吾覺非其未  
遠掃習氣於一除馱飲杯酒與瓶甕而日踈清明宛在  
其躬泰宇定而室虛譬猶醞酸出難蓮生於泥糞壤積  
而菌芝疾驅於通道大都而去其蒺藜當是時也豈不  
甚竒矣哉夫以易為樂者由於險以常為樂者本於變  
是故汨沒於是非者始知真是出入於善惡者始認真  
善今公子富貴出於襁褓詩書起於門閭頡頏六館世  
襲甲科游戲官初嚴以自律所謂不類之珠無瑕之璧  
又何用判醒醉於二物公子聞而笑曰夫無倫者醉之  
孰為醒

六州頭歌弔武穆鄂王忠烈廟

中興諸將誰是萬人英身草莽人雖死氣填膺尚如生  
年少起河北劍三尺弓兩石定襄漢開虢洛洗洞庭北  
望帝京狡兔依然在良犬先烹過舊時營壘荆鄂有遺  
民憶故將軍淚如傾說當年事知恨若不奉詔偽耶  
真臣有罪陛下聖可鑒臨一片心萬古分茅土終不到

舊姦臣人世夜白日照忽開明袞佩冕圭百拜九原下  
榮感君恩看年：二月滿地野花春鹵簿迎神

六州歌頭

鎮長淮一都會古揚州升平日朱簾十里春風小紅樓  
誰知艱難去邊塵暗胡馬擾笙歌散衣冠渡使人愁屈  
指細思血戰成何事萬戶封侯但瓊花無恙開落幾經  
秋故壘荒丘似含羞 悵望金陵宅丹陽郡山不斷鬱  
綢繆興亡夢榮枯淚水東流甚時休野竈炊烟裏依然  
是宿貔貅嘆燈火今蕭索尚淹留莫上醉翁堂看濛濛  
兩揚柳絲柔笑書生無用富貴拙身謀騎鶴來遊

六州歌頭淮西帥李訖和仍為書廟額

高皇神武善駕馭豪英攘北狄驅郡盜命天膺救蒼生  
柰夔繞沙漠隔溫清屈和好召大將歸兵柄列樞庭公  
指汴京威已振河洛不顧身烹失一時機會嗟左袵吾  
民痛岳家軍孰扶傾 久沉寃憤七十載還復遇帝王  
真表遺烈錫王號日照臨激士心始識安劉計寧禍已  
是忠臣我乘傳訪壁壘想精明英氣凜然若在題扁昭  
揭天恩笑原頭荒草死不能春交怨人神

沁園春送辛幼安弟赴桂林官

天下稼軒文章有弟看素未遲正三齊盜起兩河民散  
勢傾似土國泛如孟猛士雲飛狂胡灰滅機會之來人  
共知何為者望桂枝西去一騎星馳 離筵不用多悲

喚紅袖佳人分藕絲種黃柑千戶梅花萬里等閑遊戲  
畢竟男兒八幕來南籌邊如北翻覆手高來去棊公餘  
且畫玉簪珠履倩朱元暉

八聲甘州送湖北招撫吳獵

問紫嵩去後漢公卿不知幾貂蟬誰能借留侯筋着祖  
生鞭依舊塵沙萬里河洛染腥羶誰識道山客衣鉢曾  
傳共記玉堂對策欲先明大義次第籌邊况重湖八  
桂袖手已多年望中原驅馳去也擁十州牙纛正翩  
春風早看東南王氣飛遶星躔

四犯剪梅花上建康錢大郎壽

水殿風涼賜環歸正是夢熊華旦解連環  
疊雪羅輕稱

雲章題扇醉蓬萊西清侍宴望黃傘日華籠輦雪獅兒  
金券三王玉堂四世帝恩偏眷醉蓬萊臨安記龍飛鳳  
舞信神明有後竹梧陰滿解連環笑折花看索荷香紅  
潤醉蓬萊功名歲晚帶河與礪山長遠雪獅兒麟脯盃  
行絨韉坐穩內家宣勸醉蓬萊

柳梢青贈妓

忔憎之地一捻兒年紀傳道瘦來肥不是宜着淡黃衫  
子唇邊一點櫻多見人顰歛雙蛾我自金陵懷古唱  
時休唱西河

代賀浙東憲

輒班省戶抗薦侯畿雖正色立朝殊鬱公卿之望然仁

聲載路頰寬解縣之憂矧輔城夙佩于思光而下吏獨  
依于德蔭其為幸會實倍等夷某官純粹稟姿淵源飽  
學詩書執禮養此心于安靜之中富貴浮雲置外物于  
風塵之表曩聞治最函奉詔還蘭臺將重於司拾禁路  
行看於振羽何為起西湖之興乃至煩至陞之馳主人  
仁思舉先宣會吳中風土夙仰聲猷不俟教條之頒已  
見歌謠之起某心所祈者天實為之吏士驚嗟振衣冠  
於麾下妻孥切笑失七筋于尊前

賀留守農卿

五膺顯擢慎撫神 上將秩元祀於園丘風姿彈壓公  
乃蕪大農之惠 更籍通融步武禁途屬聯輿論某官

稟姿閑達植德高明學窮百氏之微眷結三朝之厚淮  
壩給運師旃分列障之威江左總戎鎖鑰守于門之衛  
平山草木鍾阜雲烟尚懷風采之新咸頌規模之壯興  
滯起廢補弊救偏使諸老大臣 恐勞精神而克在長  
材遠識乃能用談 以成功九重爰念于忠勤一事暫  
勞于原隰列城更化四面視儀眷是行 實難敏于國  
人諸大夫之倫謂必當屬之我公凡民有君子之心知  
無以加于此會蓋將護玉輿而郊上帝陪禁從而慶三  
宮然後上紫宸之班次第登皇圖之貴庸恢遠業式慰  
民瞻某幸以諸生得參下走夙重蒙于恩過近已許于  
甄收不勝踊躍之私莫盡贊揚之義豈惟今日吹寒谷

之笙竽終待來年八清風之飛李

賀徐封兼直院淵子

榮膺一劄驟拜九 錦省判封尚在郎官之列玉堂寓  
直行為學士之真衆驚妙選之得賢獨喜斯文之有主  
共惟某官才兼人之十倍學通古之百家以載鶴之船  
載書八觀之清標如此移買山之錢買硯平生之雅好  
可知惟其超群出類之不凡所以作賦吟詩而逾妙始  
宰西昌之邑旋分南紀之州歌陽春白雪之詩相為宋  
玉之表裏和落木澄江之句孰知山谷之主賓七言常  
許其判花一日忽傳其視草曰金曰玉定市價於已先  
非雀非風見王師之果至連炬先搖於落筆藥堦響動

於鳴珂欲窮牋管之賀言不過台衡之異數未知桃觀  
漸驚燕麥之非 覓竹籬更有江梅之好某一無知己  
百不如人但能敬宗伯而變唐文稍以壓虫魚而箋爾  
雅老矣直鉤之釣喜茲大厦之成知判誥入翰林我昔  
預期于大手經品題作佳士公今當念于蒼髯頌詠之  
私編摩罔既

賀廬師程徽猷鵬飛

陞華微閣移鎮巨藩駕千里之舳舻從天而下達十州  
之牙纛易地則然况睽違叔子之峴山而指顧謝安之  
淝水望歷陽而八境憇遺愛之甘棠道秋浦以過家衣  
故鄉之畫錦功名鼎盛福祿階升父子同時蓋此際身

冠之未有弟兄使虜亦金烏鴈塞之所無譬猶全家白  
日以上天何異萬貫纏腰而騎鶴所以欣々而有喜至  
於挈々以遠來以賀而言非辭可記共惟某官九華礪  
礪之器大江洶湧之材自唐虞三代以來無書不讀除  
李杜數家之外其詩最工雖決科續後於衆人而治縣  
獨名于一世身處繁雜而不亂核羽檄于莫容致詰之  
間變生倉卒而有謀流貨泉于不可行之後非無館閣  
進文字語言之職亦有臺省叙糾彈封駁之官上念神  
州久淪沙漠蛇豕互為之吞噬胡連浸衰獺鷲未免於  
先驅虜亡可待欲以英雄之士乘其機會之秋故畀之  
亞父所封之城而受以三國必爭之地矧合淝之所部

跨全楚之雄邊若亦壁之得周卽始名出將如中原之  
非祖述誰可渡江膺眷甚深遷除特異要當收拾人材  
而盡用庶幾恢復境土以成功三千餘年黃河始清維  
其時矣二十四考中書之令屬之公乎某幸杖履之魯  
陪阻門墻而益遠有書為患幾不容於天地之間無家  
可歸但落魄於江湖之上繼絕帝鄉之夢辛勤淮甸之  
行莫吹寒谷之笙竽無復賞音之山水視文章為小技  
人久廢語言悞富貴之儻來甚安貧賤然辱塗而自弃  
者固士之不幸見華軒而頌美者亦人之真情訪杜甫  
於浣花溪邊尚冀嚴中丞之慷慨燕王勳於滕王閣上  
猶希閣都督之風流

代王掌書迎候諫教

主奉堯章自愧草茅之賤來分魯教幸從荇藻之遊輒  
憑一紙之書敬展諸生之禮共惟某官人材翹楚丰度  
整齊學有淵源不止春育海涵之富教行場屋無非日  
光玉潔之文視唾手而取功名連摘髭而掇科第以朱  
幡之重鎮得絳帳之真儒寒坐客之氈誰謂廣文之官  
冷側求賢之席佇看天子之詔來某老漸無聞推猶不  
去職宸奎而共寶煥御墨之一新溷韋而于雲漢之中  
日懷驚悸拜琬琰于塵埃之外惟誰謹秘藏辛先生之  
賜臨使弟子之切疵流鈴擲火永同神物之護持仰斗  
瞻山更期飲食而教載

為吳縣尉俞灝商卿作排青軒上梁文

夫差國大蘇為湖常秀之尊東野官卑尉處簿參丞之  
底覺身外之塵埃可見柰胷中之風月自佳爰葺西偏  
求為左記某官精神玉雪名譽斗山蓋嘗讀萬卷之書  
不自意百夫之上凝香畫戟合置之鈴閣以俄詩撻鼓  
水鄉今乃以儒官而警盜納須彌于芥子坐塗炭于朝  
衣解宇甚卑難為展布園亭不治無以遊觀稍仍舊之  
數椽用作新于一絕門洞開而盡闢瓦鱗次而不飄窓  
紙虛明簾旌搖動湖山繚繞着身圖畫之間竹桂雲森  
揖客旌旗之下體因居而侵大心與地以俱平遂伸作  
尉之腰小試活人之手偶留十日獲見一班眉目始：



烟樹濃粧之西子衣裳楚：荷花傳粉之六郎棊局留  
殘如行道院雲香剔蠹似到館中擷尊菜以蕘羹款已  
歸之張翰持蟹螯而薦酒酌未醉之劉伶輒以從遊見  
之頌述

東子真端的有仙風壺天留得春長在腮上桃花非  
酒紅西莫增此室尚早棲湖水漸平風浪退一雙鴻  
瀾出清溪南老子清貧舊已甘若言富貴求而得未  
必玉堂如草庵北吳運之衰今已極閉門便學草檄  
書不可擒王止擒賊上想見詩成更官樣庭空吏散  
寂無人消得行吟筇竹杖下掃地焚香作清夜維摩  
大室等空虛不是尋常縣官舍

右伏願仙風不老官職益高歸真玉堂對翻塔之紅藥  
獨提椽筆尊拜相之白麻雲霄上手九天河海闊乎千  
里尚期他日卧老夫于百尺之樓何待來年底寒士以  
萬間之屋

### 與許從道書

九月初三日友生廬陵劉過再拜致書從道省足下某  
不肖屬交下風幾年矣倒指記之自戊申及今己未日  
月逾邁動經一紀君猶書生我為布衣嗚呼人生幾二  
十年哉追念疇昔定交於行都而盍簪于儀真邂逅于  
金陵姑蘇行路之難中憂百罹此如人飲水冷暖自知  
不可為他人言也他人讀書句讀猶未通把筆為文章

摸樾窟竊粗曉聲病即取高第為時達官足下試于鄉  
于湖南江東兩浙僅能一再中而姓名上禮部輒報罷  
某亦自借湖南之次寂寞無聞此兩人者所謂天壤間  
無聊之人耳交可以絕矣而相知者益深嗜艾嚼蠟計  
足下懸之于某已自有不可曉者而况于僕哉方珉隱  
先生教學于湖也從遊之士無慮數百人然而獲親且  
近者亦不過六七八人執經疑難爭相雄強是故豈肯以  
以氣下人者足下于是時獨以春秋為諸生冠先生持  
文衡其間既示人以低昂輕重之公諸生雖不敢以私  
議足下而後來乃稍各以所長脫去場屋矣而足下  
名尤隸于貫籍澹庵題名具存每一讀之不勝龍猪之

嘆靜言思之先先生豈欺予哉雖然某亦豈受人欺者諸  
人墨客之流某雖未造閭與亦嘗涉其涯涘矣至有與  
其學而醜其所為愛其辭章而不樂其行義外剛內柔  
首尾舛逆往之貌是而心非之者皆是獨于足下退降  
俛伏之無地自言若是則某亦自欺者而併于足下欺  
之哉韓退之交游相識千百人或以事聞或以藝取或  
喜其一善或以其久故至于崔群則獨相與如骨肉兄  
弟不知群何脩飭而能取重于退之如此哉盖足下之  
所挾甚能使某犁然當于心者有不獨春秋三傳而已  
其學正大其文條暢而甚華其議論宏闊深遠而有餘  
味又深知古今之變國家興衰成敗之數與之談及邊

庭障埃戰守形勢又有洞然而不駭且其賦性明敏不  
詭隨雷同初視之若毅然有不可犯之色而其實和平  
樂易善與人交掩覆其所短彌縫其所長乃如某者落  
魄不檢諸所交游者莫不厭而惡之 怒嫉罵叢至沓  
來足下恬不加恤待之如此某所以感激悲嘆其深相  
知者大畧如此而其不知者可勝道哉今年夏偶來東  
陽東陽足下之鄉某始獲拜其親識其子弟與其厚善  
者游詳聽審觀又知足下處鄉里者靜重而寡合雖然  
君貧于家與某之窮于途者不同某惟一身上下聽其  
意之所適從足下則不可也足下客諸侯亦久矣而卒  
無所成田園荒蕪親老而食指衆言而聽倡而和者誰

歟開心胃濟緩急者誰歟夫使我有為而人 愛開  
心見誠通融有無患難相濟者不徒尔也必先豁然有  
以示人不疑 兩忘然後木石頑朴者可感動而况於  
有情哉今足下之才不患乎少某猶為足下不滿者器  
局似未甚開廣有所欲言者輒慙恧退縮而不自安得  
非坐一貧賤故戚々憂憤朝夕徬徨若將有物以掣其  
肘者此等意態必能成病范滂郭林宗隱不遠親貞不  
絕俗足下蓋嘗尚論林宗而友之者而欲隱貞而違親  
絕俗而抑姑取其名而忘其實乎某本非放縱曠達之  
士垂老而無所成立故一切取窮達貴賤死生之變寄  
之盃酒浩歌痛飲旁視無人意得有所逃者于是礼法

之徒始以狂名歸之某亦受而不辭比之足下孤介峻潔視天下皆不屑為者豈不萬々相遠然某誠恐拘挛已甚則近于自隘偏于執方則所行必多滯古之通材達人疑不如此某坦蕩不羈雖不可以為法然而于足下不用于時均也但差樂耳以吾之所有易足下之所無藥其膏肓之疾而起之亦朋友切磋琢磨之義也昔杜征南有左傳之癖足下于傳可謂通矣豈外有所癖耶正言程冬老丁未歲尉長興時為某言今天下惟四常某聞其言而甚驚冬老之言曰夫婦父子兄弟君臣此四者不可易之道獨朋友一常為不講故曰惟四常由今觀之冬老致身雲霄之上某亦豈無半面之雅

而辱在泥塗邈如路人朋友之道講不講何人也栖々異鄉與足下兩途相值他人尚可責哉秋風益高車馬戒塗淒其此心又未知足下于何歲年會于何處而試于何地而得失為何如朋友一常尚異他日與足下共敦之有懷于斛書不盡言不宣某再拜

贈徐子容說

東陽山水之屈其民健而善聞其士大夫力學而有節氣風聲所樹大畧如此切嘗試以他縣人才計之在閩浙間未為極盛倒指而數由今文武兩科而仕者三十餘人比吾江西亦云多矣然而通顯于朝者寂寥而未聞而名實孚于天下者亦罕見推原其由豈非世家少

而師道不立之故歟國朝韓呂以元勳厚德居河之北山之東其後碩人繁衍散而四方多至百而千彼非皆習訓詁盡業文章蓋其文獻典刑深入肌膚故子孫亦感其化見之設施不容不

河汾當

隋末擾攘之秋英偉雋特之士因伏草莽無以自見王氏從容義理相與房杜以功業發身者其門子弟居半嗚呼此豈區區口舌論說者所能致哉吾友徐子容此邦之著姓也其兄弟子姪亦漫有貴者今又私以其道淑諸人閉門受徒戶外屨滿此宜某之所加敬而不敢竊議者今猶續進是說豈非王謝子弟貴乎見聞以退之而為師且有位卑之羞歟吾觀子容墳直而甚文和

易而有節此可以師者其徒有能自經文詞賦之外以吾說推之則謀王斷國之論致君澤民之業出將入相之才蒞官行德之方他日之所成就當不止此毋徒曰吾計止應科舉圖官職而已耳年月日劉生說

建康獄中上吳居父時魏杭廣天為秋官

范曄詐稱張祿蓋有所謀少游即是太虛別無他意但可辨薰蕕之有臭不當使玉石之俱焚輒據屈抑之情上瀆神明之聽伏念某戶陵生長明海倦遊鼓行之老氣不衰嫉惡之剛腸猶在漢廷重賈太傅上曾覽積薪厝火之書江南有賀方回人爭誦芳艸斷腸之句敢期無謂亦到有司用一身于囹圄之中不勝塗炭被五木

于拘孛之下正值冰霜累知已以併臨辱長鬚而下及若不擢髮而盡數其罪亦有百口而莫辨其辜橫逆之來哀鳴有以共審某官列三公之數帥為諸道之尊文翁闡儒教于蜀都不聞著述常袞振文風于嶺嶠所欠盛名唯道德之脩兼數者而有之故位望之高列諸藩而未已貂蟬茅土與國全休玉匱券書其門益大此尚今時之間有若夫前世之所無公獨一人名高千古骨法壽天人之相精神行地上之仙不以身為將相而敢忽于細微不以才兼文武而尤勤于學問性耽佳句無非人間未見之詩真州行書更作天下不刊之字尊君親而彌敬遠形勢而自踈久為戚畹之範模可作世家

之龜鑑有如登嶽尤戒多門若吳若仲平虜委巷匪人窮閭下走棄母親而勿待冒國恤以圖歡揮買咲之金動糜百萬磨折簪之玉苟合再三積威暴如虎狼忽交游如蟻蝨鴆毒安晏蛾眉痛心但知浮花浪蕩之足觀誓全穴死不悟冶葉倡條之微意久欲釵分氣一怒而火攻星四馳而劍舞兇焰有如此者鋒鋸誰敢當哉韓擒虎在門顧麗華而難恋陶朱公有意與西子以偕來共掩其非合汚其利枚數赦前之小過歷陳試後之虛名蒼生如謝安石何事無誑取汝竟識袁彥道否王有假時尚虞小人之多贊或陷君子于不義望冰鑑致妍虫之察使權衡無輕重之差曾參雖未審殺人疑信尚

生于慈母赤璧若果然放火踉蹌亦走于阿瞞况在陪  
都寔非細事倘強橫少加于裁抑則善良始可以保全  
邠生坐獄中而上言始猶寬抑召伯憇甘棠而聽訟終  
窺寬平過此以還未知攸諧

## 附錄

### 閩風先生跋

予友劉改之少負不羈之才加以邁往不屑之地落魄  
一世傲睨萬物罵怒嘻笑皆成文章斗酒百篇佇立可  
就有志無時用弗克施費恨而歿詩亦隨手散逸百不  
存一二予嘗遊乍嶼山于郵亭僧舍得其詩五十六首  
刻于潛川類集恨未能會粹其餘也會方巖先生出師  
江西之明年其弟潤之復錄一篇并手蹟數紙乃往歲  
送公還鄉所賦公敦公叔把臂之義興羊恬不位之仁  
跋以妙語亟伐堅珉刻廬陵郡齋雖山陽晚笛之感高  
山流水之思揚巨源之說項斯杜牧之叙李長吉由

今視昔尤切于榮耀焉改之縱沒猶生之年也改之名  
過太和人也閩風劉俊誌

東陽游戲序

慶元己未夏六月廬陵劉改之來遊東陽幾月日得詩  
文五十餘篇將行集之因為之序予以為山川人物固  
豪傑之士所樂觀而願識者然貧困征行山川過目輒  
失向背交游滿前臭味平生雖所願樂蓋亦未易得也  
改之遊吾鄉徃來石洞清潭山谷間盤薄邑里賦詩最  
多邑之善士莫不傾接探幽發秘却短從長與夫風俗  
美惡典刑廢存固已盡得之矣然而改之貧自若也司  
馬子長游天下其所以求于世者與我異倦遊來而文

始竒改之讀書論兵好言古今治亂盛衰之變與予交  
十二年今老矣未嘗一日不遊也每見則氣益豪詩益  
振文益古蓋其所得于天下者富貴不足以累其心故  
能驅役山川戲弄人物劇談痛飲世自賢亦與造物  
游而未知所止也其與子長孰後先乎詩文一篇遂為  
東陽故事凡吾識改之當不忘也秋九月朔許從道  
序

殿撰侍郎王安撫送改之詩

名滿江湖劉改之半生窮困但吟詩人言季布恐難近  
我謂此老真吾師試令滿飲至酩酊會覺高論生神奇  
富豪有財不識寶貧者識之空嗟咨



其二

劉子堂：七尺軀高談世事奮髯鬚觀渠論到前賢處  
據我看來近世無出語令人驚辟易處窮無愧敢擲榆  
倘伴鬧市渾無畏真是人間烈丈夫

其三

不識劉郎莫便誣酒酣耳熱未全踈士當窮困無能怯  
我自斟量愧不如橫槊賦詩未有分輕裘緩帶特其餘  
當今四野無人士宜有奇才在草廬

竹隱先生徐侍郎詩

江西詩社久淪落晚得一人劉改之不向嶺頭拈取去  
此衣此鉢付他誰

謫仙此日號無敵侯喜中間有邁聲後五百年無繼者  
得渠一句便堪驚

一生能著幾兩履萬戶何如千首詩竹隱在傍湏竟造  
醉鄉有路莫他之

風吹客袂遊甘露雪打人頭入半山無故被他林鳥教  
競傳新句落人間

閉門長安十日雨車馬黏蛙鼃多若往淡然應子是作  
商聲者必君歌


東陽呂英父詩

襄陽劉子謫仙儔揮斥塵寰却邁遊醉眼茫洋天地窄  
吟蒐淒蕩鬼神愁生來不帶封侯骨老去徒深活國謀

且暮風塵起河朔未容埋沒委山丘


李大方以改之下第賦此詩以贈之

劉郎氣豪酒豪詩更豪乃肯折節作賦遺恨無纖毫詩  
佳賦老不入世俗眼仰空大叫索酒歌離騷劉郎新詩  
今莫敵挑戰梅吐無遺力卑然苑杏一山開龍馬行天  
曉無迹錦標重奪已三年却來走馬春風前撐腸文字  
五千卷吟哦得三楊羞鞭世間榮辱俱遊戲莫為功名  
消壯志戎革胡不報然劉蕡况是公家事銀盃錦被綉  
驪裘呼童喚酒麈勞愁自怜却為微官縛不及相從上  
酒樓



此石研齋秦氏故帙也余別得一本亦係劉澥序王  
朝用校丁巳中和節翁同書志于揚州軍中是  
日暮寒雨雪曉起聞焦山艇船礮聲





龍洲先生集一卷附錄  
一卷

宋劉過撰

清抄本〔清翁同書跋〕

一冊

本部書完

書 號 6156

本片卷含